

河南開封鄭州志叙



司馬氏曰世稱故國者匪獨其山川形勝之美也蓋亦繇文獻之助為鄭州即古鄭國屬境而故名鄭者乃在溱洧之間當春秋時鄭介楚晉其勢危矣而公孫僑諸君子獨以詞命重於諸侯鄭國賴之遺愛流風膾炙人口當有紀載而州志歲久蓋漏闕佚文獻無繇尚何為故國哉嘉靖

辛亥徐君恕者來守是邦輯和其民而脩其政化洽人宜嘗好觀故事而愍志之陋也以授余年友王東圃氏校為東圃固博學而擅三長者也乃經羅放失葺焚續缺頗加刑潤分卷為六曰輿地志曰田賦志曰建設志曰職官志曰人物志曰雜志既成編徐君使來謂余曰子舊史也蓋為我叙之余不敏遂綴一言於簡端在昔

玄黃剖判皇王御極畫野割封建侯置長禮樂刑政緣制而迭起各有史以紀時事禹貢職方而下如周禮小史所掌是已後乃易史為志今天下省郡州縣往往有之其殆史之流與志也者識也以存故實寓鑑戒非徒文為而已省郡槩其統體志畧而泛州縣備其纖悉志詳而專均之不可無也風漓政衰良有司代不多見

治行功能或未厭人而遺憲往哲日以湮
泯何可勝數也間有叙述則又稍乖體
要文質詳畧罔協厥衷故論次詳矣
而失之穢懲勸爽矣而失之誣亦何取焉
故江文通有曰作史之難無出於志蓋以
憲章所繫非老於典故者弗能也今觀
鄭志析名類以辨物昭軌度以示信綜古
今以覈實甄臧否以垂鑑贍而弗穢約

而能確上下古今雖其文成一家言而要其
義則有古作者之風為信可愛可傳也
已昔僑也博物孔子稱其惠徐君為政
愛民雅敦文教固能法乎古人者然非
東園亦莫能成斯舉也二君有功於鄭多
矣嗚呼以人為鑑可知得失以古為鑑可知
興替故欲考鄭之文物會是奚以論其
世知其人懲勸從違犁然指掌因以化民而

成俗為則，是志也將為鄭之信史，而益有


聞天下詩曰：先民是程，大猷是經。蓋謂此



也。后之覽者，當有感於斯言。



嘉靖壬子首夏之吉


賜進士出身奉議大夫兵部車駕清吏司郎

中前翰林院庶吉士洛陽吳三樂撰









鄭州志目錄

卷一

輿地志

沿革

風俗

街巷

卷二

建設志

城池

祠祭

星野

山川
附井泉

鄉村屯坊保附

公署

廟學

驛道

附舖舍

疆域

陵墓

形勝

橋梁

山梅

山泰

侯崗



卷三

田賦志

土田

戶口

統糧附農桑課程

徭役

物產

卷四

職官志

官制

郡官

學官

名宦

卷五

人物志

賢行

節義

科第

歲薦附列貢

卷六

雜志

寺觀

古跡

仙釋

藝文

鄭州志目錄終

鄭州志卷一

後學主繼洛 重校

儒學訓導楊琅正訛

輿地志

沿革

鄭州禹貢豫州之域古高辛氏火正祝融之墟周初封管叔於此為管國春秋屬鄭國秦屬三川郡漢屬河南郡後漢因之分置滎陽郡宋亦然後魏為東恒農郡東魏置廣武郡後周置滎州後改為鄭州隋置管州煬帝初復為鄭州尋廢州置滎陽郡唐因之屬

河南道領縣七

管城滎澤原武滎陽新鄭中牟陽武

梁為防禦宋為奉

寧軍熙寧五年廢州以縣屬開封元封八年復之崇

寧四年建為西輔屬京西北路建炎二年沒於金

復為州隸河南路元仍為州領縣八

管城滎陽汜水河陰原武新鄭密縣滎澤

國朝因之隸

滎陽汜水河陰滎澤

四縣編戶三十三里

星野

按周禮保章氏以星土辨九州鄭屬豫以地而占

天象角亢其分野春秋左傳云襄公二十八年春

無水梓慎曰今茲宋鄭其饑乎又曰龍宋鄭之星

也

註云房心為宋角亢其鄭

漢地理志云亢之六度謂之壽星

之次鄭之分野水經云鄭處辰火之野或云角亢

在辰自軫十度至氐一度鄭地應之星經云角亢

鄭之分野雖然此特據成論耳必求其實則天之

高星辰之遠非精象緯之學者詎能測之耶併存

以俟考

疆域

東中牟縣

西滎陽縣

北滎澤縣

南新鄭縣

東至中牟界三十五里

西至滎陽界十八里

北至滎澤界三十五里

南至新鄭界三十五里

東到中牟七十里

西到滎陽七十里

南到新鄭九十里

北到滎澤五十里

東南到洧川一百四十里

西南到密縣九十里

東北到原武七十里

西北到河陰五十里

形勝

左雒右沛

漢地理志

壘障層巒

廟學記

崧嶽成阜環峙後先濟洛滎河襟帶左右

古碑

西臨京水東接汴河

薛文清詩

風俗

習淳尚質

漢地理志

好稼穡重於禮文其風丕變於古

隋書

趨利纖蓄

杜氏通典

風俗淳厚

九域志

比屋農桑

唐詩

土沃民淳

古碑

民生質朴事從簡儉

省志

夫近年迺有不然者蓋弘治以前民風尚淳俗崇儉約今則競為奢靡專事紛華信師巫尚淫祀遊手之徒繁力本之風微甚至有喪之家僧道兼用倡優雜進雖婚姻嫁娶亦所甘心吁其可傷也已

茲欲易移尚賴樞機

山川附井泉

太山在州南四十里

梅山在州南三十里

紫荆山在州北一里

象河在州東南八里

圃田河在州東三十里湖

汴河在州北三十里

京水河在州西十五里

金水河在州西一里

梁家湖在州南曹保

小回湖大回湖在州東北三十里

減水溝在州北三十里

蓮花池在州東五里

御井在州西門外

槐花井在州治西

靈泉在李衛公祠後

陵墓

周世宗陵在州南五十里

裴晉公墓在州南三十里詳見吳侍制記

霍順墓在州西北石佛保詳見翰林學士元明善記

王武公墓在州西南留保詳見宋學士韓絳碑文

陳留侯哈丹墓在州東南曹保詳見學士吳徵誌銘

遂平榮靖王墓在州西北姜村保詳見紀善梁璣墓碑

王都御史墓在州西南二里詳見大學士楊榮碑文

橋梁

迎春橋在州東通汴河

廣濟橋在州北門外通京水河

廣通橋在州南門外

和義橋在州西門外通京水河

政通橋在州北二里

街巷鄉村邑坊保附

時豐街 大市街 敏德街俱東

里仁街西 咸寧街南 清平街北

槐花巷 絳坊巷 回回巷內俱回回群處

圃田鄉 管鄉 懷忠鄉

富戶鄉 趙本村 朱村

蘇家村 來同村 圃田屯

西焦屯 鄭何屯 祭城屯

車營屯 德化坊在州南隅 善政坊在州西隅

善教坊

在州東隅

宣明坊

在州東北隅

齊里保

在州西南七里

中鮮保

在州西南十五里

南馮保

在州南十里

南留保

在州南三十里

青店保

在州南三十里

南城保

在州南三十里

西曹保

在州東南二十五里

南曹保

在州東南三十里

北曹保

在州東北三十里

西焦保

在州東二十里

鄭何保

在州東北五里舊東張保今併入

西張保

在州西北二十五里舊張

祿保今併入

中閭保

在州東北四十里

姚店保

在州北三十里

京水保

在州北三十五里

東黃保

在州北二十里

西黃保

在州北二十五里

東趙保

在州北三十里

西趙保

在州西北三十五里

南趙保

在州北二十五里

北房菱保

在州北十五里

南房菱保

在州西北十五里

白菱保

在州西北二十五里舊里

仁保今併入

石佛保

在州西北二十五里

姜村保

在州西十五里

時豐保

在州東南三十里

咸寧保

在州北三十里

西城保

在州東北四十里

新安保

在州北四十里

卷二

建設志

城池

城圍九里三十步高二十尺廣十尺有奇唐武德

四年置營州時所築宣德癸丑知州林厚因舊址

建置四門東曰寅賓西曰西成南曰阜民北曰拱

辰成化丙申知州洪寬重脩設角樓四座更舖八

所城垣之外鑿池深一丈濶倍之正德辛未知州

蕭淵築甕城四所成寅知州劉仲和置警舖七十
二所築女墻一千六百有奇民至今賴之云

公署

州廳宇唐武德四年置管州時創建

國朝洪武初知州蘇璫因廢址重脩宣德四年知州

林厚重建儀門正統六年知州史彬建正廳成化

十一年知州洪寬建後堂暨東西六房公廨吏舍

正廳五間

後廳五間

幕廳五間

儀門五間

東三房十間

西三房十間

鐘鼓樓知州童寬建

架閣庫

園囿

土地祠

旌善亭

申明亭

知州宅

同知宅

判官宅

吏目宅

吏舍

預備倉

在州治東

架閣庫

在州廳西貯各文卷

庫

在州廳東貯各賊贖

惠民藥局

在鼓樓西南

布政司

在州治東正統八年知州史彬建

按察司

在布政司東管城縣舊址宣德二年知州林厚建

府館

在州治東

養濟院

在州治東

漏澤園

在州北門外二里

桑園二所

俱在門外西

演武場

在州東門外一里

廟學

廟學漢明帝永平間創建元至正間知州黃廷佐重脩

國朝洪武乙亥知州張奮宣德癸丑知州林厚正統甲子知州史彬成化壬辰知州洪寬弘治甲寅知州郭宏正德戊寅知州劉仲和俱各重脩

敬一四勿箴亭知州韓邦彥建泮官坊 泮池

橋在李南俱知州稍騰漢建 尊經閣知州胡萬里建

射圃亭在明倫堂西南 育德倉在明倫堂西

學正宅 訓導宅 社學在州治東

屬署 鋪舍附

管城驛在州治西南洪武元年驛丞王敬祖建

正廳五間 後廳五間 左右馬房

左右廂房 驛城宅 小廳

馬神廟 鼓樓 糧僉馬一十四匹

浙江省戶馬二十八匹 永充馬二匹

糧僉馬三十二頭 管夫一十二名

鋪陳庫子二名

迤運所舊在州東十里舖洪武元年大使唐德茂建正統六年知州史彬

奏改於東門外成化十二年復改在城東街

正廳 大使宅 牛神廟 車四十三輛

牛一百七十三隻 牛夫一百七十三名

防夫二十九名

僧正司在州北門外洪武十五年僧正仁壽建

稅課局以稅額不及三萬貫廢 陰陽學 醫學俱在州治東

總舖在州治東

西焦舖東十里 道士舖東二十里

圃田舖東三十里通中牟 侯崗舖西十里通滎陽

七里河舖南十里 十八里河舖南二十里

林錦舖南三十里通新鄭 朱村舖北十里

許橋舖北三十里 趙本村舖北三十里通滎澤

堡十二所

東三所 西二所 南四所 北三所

祠祭

先師廟 啓聖祠 文昌祠 名宦祠

鄉賢祠俱在儒學 社稷壇西門外 風雲雷雨山川壇南門外

厲壇北門外 城隍廟州治東 子產祠州治東 關王廟州治

東宋太平興國年建 李衛公廟在州東門外二里許 繼嗣祠在城

隍廟 明山廟在州南門外二里許 玉仙廟在明

山廟 玄帝廟一在儒學東一在南門外 三官廟在

州治西一
在東門外

裴昌公廟

在州治西南

東嶽廟

一在北門外一

在東門外

卷三

田賦志

土田

洪武二十四年官民田地三千四百四十二頃五

畝五分七釐七毫

永樂年官民田地三千四百四十二頃五畝五分

七釐七毫

宣德年官民田地三千四百四十一頃五畝五分

七釐七毫

正統年官民田地三千四百四十一頃五畝五分

七釐七毫

景泰年官民田地三千四百四十一頃五畝五分

七釐七毫

天順年官民田地三千四百四十一頃五畝五分

七釐七毫

成化年官民田地三千五百二十頃七十二畝五

分七釐七毫

弘治年官民田地三千五百二十頃七十二畝五

分七釐七毫

正德年官民田地三千五百二十頃七十二畝五分七釐七毫

嘉靖自九年丈量過實在官民田地一萬七百四十八頃三畝四分四釐五毫

戶口

洪武年戶三千七百六戶口二萬三千四百五十五口

永樂年戶三千六百一十七戶口二萬六千六百四十五口

宣德年戶四千一十四戶口二萬八千七百七十三口

正統年戶四千五十四戶口三萬二千五百六口

景泰年戶四千二百六十七戶口三萬八千四百八十二口

天順年戶四千七百五戶口四萬五千二十四口

成化年戶五千一百四戶口五萬二千五百六十六口

弘治年戶五千一百四戶口五萬二千五百六十六口

正德年戶五千一百四戶口五萬二千五百六十
六口

嘉靖年戶六千五百二十二戶口五萬九千六百
五十八口

稅糧

洪武年

麥八千五百三十三石六升三抄三撮五圭

絲四千九百二十一兩七錢七分陸釐三毫

米二萬三百六十八石九合八勺九抄

永樂年

麥八千四百六十四石七斗一升六合八抄七

撮五圭

絲五千四十六兩九錢九分九釐三絲

米二萬三百六十四石三斗三合九勺一抄六

撮五圭

宣德年

麥八千五百六十九石七斗四升七合八勺八

抄二撮七圭

絲五千五百六兩二錢六分七釐三絲

米二萬二百四十五石八斗六合八抄四撮

正統年

麥八千五百六十九石七斗四升七合二勺八抄二撮七圭

絲五千五十六兩二錢二分七釐三絲
米二萬二百四十五石八升一合八勺四撮
景泰年

麥八千五百六十九石七斗四升七合二勺八抄二撮七圭

絲五千五十六兩二錢二分七釐三絲
米二萬二百四十五石八升一合八勺四撮

天順年

麥八千五百六十九石七斗四升七合三勺
絲五千五十六兩二錢二分七釐三絲
米二萬二百四十五石八升一合八勺四撮

成化年

麥八千五百六十九石七斗四升七合三勺八抄二撮七圭

絲五千五十六兩二錢二分七釐三絲
米二萬五百七石九斗八升三合八勺四撮
弘治年

麥八千五百六十九石七斗四升七合二勺八撮七圭

絲五千五十六兩二錢二分七釐三絲

米二萬二百四十五石八升一合八勺四撮

正德年

麥八千五百六十九石七斗四升七合二勺八

抄二撮七圭

絲五千五十六兩二錢二分七釐三絲

米二萬二百四十五石八升一合八勺四撮

嘉靖年

麥八千五百六十九石七斗四升七合二勺八

抄二撮七圭

絲折京庫絹二百五十二疋二丈四尺三寸四

分五釐四絲五忽

米二萬五百七石九斗八升二合八勺四抄

洪武年

原額

桑二萬四千七百八十五株絲綿八百二十一

兩九錢九分七釐

棗三千五百五十五株易米三百一十九石九

斗五升

嘉靖年

桑二萬四千七百九十六株折京庫絹四十二疋六尺八寸四釐

棗三千五百五十五株易米一百六十三石九斗三升五合

課程

鹽鈔有閏四萬七千四百六十九貫五百文

無閏四萬三千八百一十八貫

課鈔有閏三萬四千二百二十六貫八百二十文

無閏三萬一千五百九十四貫二百四十二文

徭役

銀差銀二千五百七十九兩二錢三分

力差二百四十名編銀九百七兩

物產

谷類

谷 黍 稷 稻 大麥 小麥

春麥 玉麥 蕎麥 芝麻 秫 菊 莞豆

菜豆 白豆 黑豆 黃豆 青豆 扁豆

絲 麻 綿花 藍

木類

栢 椿 楊 榆 楸 桐
槐 楮 棠 梨 柳 桑

果類

棗 棟

棗 柿 李 梅 桃 核桃

蓮房 蒲萄 杏 石榴 梨秋夏二種 西瓜

甜瓜 芡食 文冠 櫻棗

蔬類

白菜 葱 蔓菁 蒿苳 蘿蔔紅一種 白一種

韭 茄 葫蘆 芥 芡 蒜

茱菜 芥菜 藤蒿 蒿笋 莧菜 冬瓜

瓠 王瓜 菜瓜 藕

花類

菊花 刺花 葵花 木槿 夜合 玉簪

山丹 鷄冠 萱草 蓮花 丁香 臘梅

藥類

麻黃 半夏 地黃 香附子

王不留行 班猫 章柳根 朴硝

天花粉 遠志 車前子 兔絲子

羽類

雁 雀 鳧 鴉 鶴 鳩
雉 鷄 鴨 鴿 鷓 鴒
鷓 鷓 鷓 鷓 鷓 鷓

鷓 鷓 鷓 鷓 鷓 鷓

毛類

牛 駃 騾 馬 羊 豕

犬 兔 狐 狸 御

鱗類

鯉 鱈 鮎 鯽 鯽 鯽

鱗類

甲類

鱉 蟬

卷四

職官志

官制

知州一員 秩從五 同知一員 秩從六

判官二員 秩從七內一員管河 吏目一員 秩從九

儒學學正一員 訓導三員

廩膳生員三十名 增廣生員三十名

附學 無定數

管城驛驛丞一員 遞運所大使一員

陰陽學典術一員 醫學典科一員

僧正司僧正一員 六房吏十八名

鋪長吏一名 承發司吏一名

架閣庫吏一名 學吏一名

驛吏一名 所吏一名

郡官

知州

蘇壽 見名宦

孫敏 見名宦

張奮 見名宦

戴思義 福建閩縣人

李思忠 陝西渭南縣人

凌賢 見名宦

楊維山 西平遙縣人 由監生永樂九年任

徐遜 浙江於潛縣人 由監生永樂九年任

林厚 見名宦

史彬 見名宦

盧信 由舉人任

曹寧 浙江蕭山縣人 由監生正統十一年任

王彥常 浙江諸暨縣人 由監生正統十四年任

余靖福建建寧縣人由監生任見名宦

趙仲壽直隸武進縣人由監生任見名宦

洪寬直隸歙縣人由舉人成化八年任

周淵江西廬陵人由進士成化十五年任

郭定山西齊平縣人由進士成化二十年任

王震山東蒙陰縣人由監生成化二十年任

郭宏直隸隆慶州人由舉人弘治五年任

趙士元陝西河州人由進士弘治十一年任

杜繁山西臨縣人由舉人弘治十五年任

翁文魁浙江蘭谿人由進士正德元年任守嚴政間盜息民安

馬夔順天府人由舉人正德四年任

蕭洲山東堂邑縣人由進士正德五年任

童寬浙江蘭谿人由進士正德八年以御史謫任

張詔廣東順德縣人由舉人正德九年任

杜旻順天府人由進士正德十二年任

劉仲和山西臨縣人由舉人正德十三年任嚴毅有為

今行禁止城池學校多所裨益

陳塘江西南昌人由舉人正德十五年任

劉汝輓江西安福縣人由進士嘉靖二年任

韓邦彥陝西朝邑縣人由舉人嘉靖七年任純篤之心

簡易之政不阿乎上
不殘乎下識者是之

稍騰漢陝西安定縣人由監生嘉靖十年任明敏

有猷有為積粟六萬
斛撫按奏蒙 欽獎

孫嘒江西德興縣人由恩生嘉靖十三年任

胡萬里陝西咸寧縣人由進士嘉靖十四年任

張應瑞直隸華亭縣人由舉人嘉靖十七年任

孫璧山西蒲州人由進士嘉靖十八年任

張文舉直隸東安縣人由舉人嘉靖二十一年任

有為有守
實心實政

呂師賢山西祁縣人由舉人嘉靖二十三年任

陳珪廣西臨桂人由舉人嘉靖二十四年任

鄭渭直隸安肅縣人由恩生嘉靖二十八年任

徐恕江西餘干縣人由舉人嘉靖二十九年任

同知

夏思齊 見名宦

呂智山東萊陽縣人由監生後陞汝州知州

王昌直隸滿城縣人由生員任

焦翼山東歷城縣人由舉人任

張需山西大同人由舉人宣德六年任陞知州

祝祐浙江仁和縣人由楷書任

陳鉞直隸衡水縣人由監生任

李亨直隸東鹿縣人由監生任

范亮直隸阜城縣人由監生任

張恕山西平定州人由監生任

孟昌湖廣荊山縣人由監生景泰四年任

宋禮浙江淳安縣人由監生景泰七年任

王禎山東魚臺縣人由監生天順二年任

王榮直隸涿州人由監生天順六年任

聞孟副浙江桐廬人由吏員成化五年任

周韶浙江上虞縣人由監生成化十一年任

李貫直隸涿州人由舉人成化十六年任

楊寶陝西朝邑人由監生成化十九年任

劉憲直隸江浦人由監生弘治二年任

陳濟浙江秀水人由舉人以應天府學訓導弘治

五年陞任有博洽之學有幹濟之才當道屢加

旌勵弘治十二年御史臺奏旌異之

黎臣四川長壽人由進士弘治十一年以戶部主
事改任後陞揚州府通州知州

胡英由進士弘治年以大理寺寺丞謫任

李友陝西朝邑人由吏員弘治七年任

吳鑾直隸吳江人由監生正德七年任

王鑑古陝西秦州人由監生正德十三年任

武魁山東費縣人由舉人正德十四年以東安縣

知縣陞任

羅章廣東高要縣人由吏員嘉靖元年任

黎超廣東新會縣人由吏員嘉靖三年任

吳賢山西翼城縣人由吏員嘉靖八年任

李騰直隸蠡縣人由監生嘉靖十一年任

嚴中泰湖廣當陽縣人由監生嘉靖十四年任

張頴湖廣雲夢縣人由監生嘉靖十八年任

蔡芸湖廣漢陽縣人由監生嘉靖二十二年任

楊棟山東壽光縣人由吏員嘉靖二十三年任

韓受爵陝西乾州人由吏員嘉靖二十五年任

楊端倫江西貴溪縣人由監生嘉靖二十九年任

判官

李士安蘇州府吳縣人由人材任

吳禎福建歐寧縣人以工科給事中改任後陞工部主事

何遠湖廣石首縣人以刑部主事改任

張綸揚州府江都縣人由監生任

姜文江西建昌縣人由監生任

劉瓚真定府靈壽縣人由監生任

李吳進鳳陽府臨淮縣人由監生任

吳敬揚州府高郵州人由監生正統元年任

黃勵應天府上元縣人由監生正統五年任

趙榮山西蒲州人由吏員正統十四年任

姚旭直隸桐城縣人由進士 見名宦

李賢山東濮州人由監生天順五年任

方新直隸祁門縣人由監生成化二年任

陶茂直隸丹徒縣人由監生成化七年任

聶濂四川長壽縣人由吏員衛經歷成化十年陞任

胡琮湖廣道州人由吏員成化十三年以衛經歷陞任

陳崇道四川遂寧縣人由吏員成化十八年任

朱埈浙江人由監生成化二十三年任

張璣直隸景州人由舉人弘治二年任

石純粹陝西鳳翔縣人由監生弘治四年以縣丞陞任

王伯爵湖廣石首縣人由監生弘治十年任

路朝顯廣東人由吏員正德元年任

袁宗直隸任丘縣人由監生正德五年任

馬允德福建建寧縣人由監生正德十年任

尚徵陝西同州人由監生嘉靖二年任

劉思誠湖廣隨州人由監生嘉靖八年任

李希惠直隸雄縣人由監生嘉靖九年任

姚熙山西定襄縣人由監生嘉靖十一年任

白廷操四川梓潼縣人由監生嘉靖十三年任

朱寵直隸吳縣人由監生嘉靖十七年任

申翰直隸永年縣人由監生嘉靖二十年任

譚允廣東高明縣人由監生嘉靖二十二年任

李奐山東濱州人由儒士嘉靖二十四年任

高對雲南大理衛人由進士御史左遷嘉靖二十

六年任

鄧臯四川名山縣人由監生嘉靖二十七年任

何進隆江西零都縣人由監生嘉靖二十七年任

蔡元祀錦衣衛藉由恩生嘉靖三十年任

劉相順天府房山縣人由監生嘉靖三十一年任

吏目

郭穎陝西人由監生任

梁俊山西夏縣人由監生任

任肅陝西葭州人由監生任

句贍順天府大城縣人由舉人宣德九年以序班

改任

王澤山東安丘縣人由監生景泰二年任

周顛陝西華州人由監生景泰三年任

張昭山東濟陽縣人由監生景泰六年任

張雄直隸清遠縣人由吏員天順二年任

馮昭山西沁水縣人由監生成化元年任

李雄山東濟陽縣人由監生成化五年任

江博直隸建德縣人由監生成化九年任

陳郁浙江仙居縣人由監生成化十一年任

趙瑄直隸蒼黃縣人由監生成化十五年任

馬瑄陝西甘州衛人由監生成化十七年任

李琦陝西葭州人由監生弘治二年任

張俸直隸青縣人由監生弘治九年任

辛安直隸人由監生正德二年任

王祐直隸密雲縣人由監生正德七年任

金進直隸樂城縣人由監生正德十一年任
張麟直隸保定衛人由監生嘉靖二年任
李唐直隸元城縣人由監生嘉靖九年任
王時和陝西綏德衛人由監生嘉靖十四年任
楊桂直隸隆慶州人由監生嘉靖十九年任
曹鎰四川溫江縣人由監生嘉靖二十三年任
孫學山東汶上縣人由監生嘉靖二十五年任
潘茹直隸海州人由監生嘉靖二十七年任
劉近明湖廣宜城縣人由監生嘉靖二十九年任

儒學

學正

薛德銘浙江會稽縣人洪武十四年任
高壽鳳陽府臨淮縣人由舉人洪武二十年任
尹月昇浙江紹興府人洪武二十五年任
趙文紀福建古田縣人洪武二十九年任
李彬山西高平縣人洪武三十一年任
倪登山東蒙陰縣人由舉人永樂十二年任
張祥山西翼城縣人永樂十五年任
嚴敬直隸常熟縣人由舉人永樂十九年任

沈衡浙江仁和縣人教化為古今鄭庠第一秩滿

陞監察御史

詳見名宦

張福直隸滿城縣人正統六年任

沈瑛直隸泗州人由舉人正統十三年任

侯儼山東莘縣人由舉人天順四年任

孟怡直隸常熟縣人由舉人天順八年任

陳初福建長樂縣人由舉人成化二年任

楊廷儀江西吉水縣人由舉人成化八年任

童蘭四川銅梁縣人由舉人成化十三年任

歐陽榮江西廬陵縣人由舉人成化十七年任

衷績湖廣崇陽縣人由舉人成化二十三年任

林文奎福建閩縣人由舉人弘治六年任

詹陵江西樂平縣人由舉人弘治十五年任

管旦江西安福縣人由舉人弘治十八年任後陞

南京國子監學正

李遇春遼東人由舉人正德七年任

鄭遠廣東人由監生正德十五年任

唐理直隸河間縣人由舉人嘉靖二年任後陞保

安縣知縣

劉勗山東歷城人由監生嘉靖七年任

楊文澤浙江鄞縣人由舉人嘉靖十一年任

潘時表江西永豐縣人由監生嘉靖十六年任

翟尚文山東嘉祥縣人由監生嘉靖二十二年任

晏思獻廣西平樂縣人由舉人嘉靖二十六年任

後陞南京吏部司務

彭標廣東順德縣人由舉人嘉靖三十年任

訓導

張默本州人洪武三年任

單齊孟睢州人洪武三年任

王規本州人洪武九年任

扈哲本州人洪武二十五年任

傅裕懷慶府河內縣人洪武二十五年任

王琰四川人洪武二十七年任

談哲直隸臨淮縣人永樂二年任

霍懋直隸巢縣人由舉人永樂二年任

汪祐湖廣蘄州人由舉人永樂六年任

陳源浙江富陽縣人永樂九年任

裴俊 見名宦

潘岳 見名宦

郭明郁 見名宦

周綸直隸江浦縣人宣德五年任

單慶直隸無為州人由舉人正統五年任

張紳直隸舒城縣人由監生正統六年任

胡敏山東即墨縣人由舉人正統六年任

李福陝西同官縣人由監生正統六年任

崔勉山東東阿縣人由舉人正統七年任

田俊直隸寧晉縣人由舉人正統十年任

孫輯直隸任丘縣人由舉人景泰五年任

吳諒江西進賢縣人由監生景泰七年任

王廷直隸靜海縣人由舉人天順元年任

林俊福建閩縣人由監生天順七年任

盛壯江西樂平縣人由監生成化七年任

陳圭浙江秀水縣人由監生成化七年任

劉潤直隸含山縣人由監生成化七年任

王廷陝西岐道縣人由舉人成化十六年任

馬禎陝西河州人由監生成化十八年任

張實直隸蠡縣人由監生成化二十二年任

莊濬應天府江寧縣人由監生成化二十二年任

李洲直隸華亭縣人由監生成化二十二年任

田朝用陝西長安縣人由監生弘治五年任

何琛陝西麟遊縣人由監生弘治七年任

趙晟直隸通州人由監生弘治八年任

宋傑湖廣穀城縣人由監生弘治十一年任

吳傑直隸祁門縣人由監生弘治十四年任

李克勤直隸高陽縣人由監生弘治十五年任

穆賓浙江錢塘縣人由監生正德二年任

何養浩四川珙縣人由監生正德四年任

李文翰四川合州人由監生正德四年任

董成山東兗州府護衛人由監生正德八年任

孟鍾山東昌邑縣人由監生正德八年任

胡秉中四川綿州人由監生正德九年任

王臣四川夔州人由監生任

劉澤民山東掖縣人由監生任

李新四川開縣人由監生任

胡璽直隸平鄉縣人由監生任

高霖山東掖縣人由監生任

徐壘直隸宿遷縣人由監生任

蕭音山東膠州人由監生任

王鑾陝西蘭州人由監生任

張誥湖廣松滋縣人由監生任

劉憲春四川忠州人由監生任

王用陝西人

史籍直隸獲鹿縣人由監生任

郭縵浙江崇德縣人由監生任

楊泉順天府三河縣人由監生任

王來夷陝西韓城縣人由歲貢嘉靖二十三年任

楊琅直隸金壇縣人由歲貢嘉靖二十七年任

孔承亮山東曲阜縣人由歲貢嘉靖二十八年任

李樂江西臨川縣人由歲貢嘉靖三十年任

名宦

西漢

周苛高帝時以御史大夫守滎陽見漢將相名臣年表

晉

習鑿齒武帝時滎陽太守見舊志

後魏

王慧龍世宗時為滎陽郡守在那十年戰農併

脩大著聲跡邊圉歸附者萬余家時號善政出北

史魏列傳

北齊

即基新市人沈涉墳典尤長吏事除鄭州長史

莊職清慎無所營事嘗語人云任官之所木枕亦不須作况重於此乎唯頗令人寫書於儀曹遺之書云在官寫書亦是風流罪過答云親過知仁斯亦可矣後卒於官

唐

陸贄嘉興人年十八第進士以博學宏詞調鄭州尉後為翰林學士時號內相

柳仲郢公綽之子京兆人宣宗初李德裕罷政事仲郢坐所善以右散騎常侍出為鄭州刺史時周墀鎮滑而鄭為屬郡高其績及人薦為河

南尹召拜戶部侍郎

宋

富弼仁宗時拜禮部侍郎懇辭不受職加資政殿學士明堂禮畢又拜禮部侍郎公以秦國大夫人久違鄉里請京西郡從知鄭州

宋祁天聖二年進士第一仁宗時為翰林學士嘉祐四年出知鄭州

宋庠嘉祐三年為樞密使五年免判鄭州王贇嘉祐二年以左諫議大夫知鄭州仁宗親書飛白安民二字賜之

祖無擇治平三年知鄭州

魯公亮仁宗時為翰林學士知鄭州賜詩赴任
陳堯佐仁宗時以平章事判鄭州

王岩叟元祐六年僉書樞密院事以論救劉贊
為朋黨出知鄭州

安壽紹聖二年以門下侍郎出知鄭州壽初與
童惇有隙惇怨益深及救御史常安民惇遂言
壽與之表裏因以出知鄭

元

劉永祚滏陽人大德二年知鄭

政績見劉光祖所撰德政碑

劉可任宣德府人元統初知鄭能崇學校勸農
桑興利除害民安吏畏州用以治及去民有畫
其像而祀之者奉議大夫元光祖為撰遺愛碑
以表循良云

黃廷佐東晉人至元二十四年知鄭廉潔不苟
沉靜詳審有幹局外寬內明喜怒不形於色刑
賞不私於已治行為一時最云

蒲理翰至元間以進士同知鄭下車首事廟學
範銅為祭器製革帛為禮服作群表立鄉賢堂
其善政類此者甚多

國朝

蘇璫江都人洪武元年任適元季兵革之後衙門僻宇壇廟多所建設時稱良守

孫敏臨淮人在官多惠政官至工部尚書

張奮山東濟陽人洪武甲戌由監生任有善政凌賢浙江歸安人永樂元年由舉人任玉山縣教諭後以求賢舉知鄭州慶事明決九載終始如一及代改應天府通判

夏思齊浙江龍游人洪武三十年任廉以守已吏民懷德

林厚廣東海陽人由進士宣德二年任有政績秩滿陞刑部郎中尋陞山西左叅政

史彬直隸溧水縣人由進士先任山東平原令後陞河南陝州同知繼陞鄭州知州撫字有方慶事簡易文章政事精通明決以此吏民懷德百廢俱舉

余靖福建建寧人由監生初知山東武定州景泰七年改任鄭州持身廉謹勤於為政勸課農桑興脩學校重崇師儒愛養黎民脩廢補墜事上接下俱有條理

趙仲壽直隸武進縣人由監生成化元年知鄭
持身端謹處事嚴明撫字心勞長於幹濟
姚旭直隸桐城人由進士任刑科給事中因論
朝臣位次改判鄭州嚴以律已勤以蒞政事上
敬御下仁崇尚禮教表正風俗文章政事入鮮
及之秩滿陞南安知府

沈衡浙江仁和人由舉人宣德五年任本學學
正作興士類文風大振秩滿陞監察御史

林文奎福建閩縣人由舉人弘治六年任學有
淵源勤於訓迪著射禮易覽刊行遠近郡縣皆

悅而習之後陞國子博士

詹陵江西樂平人由舉人弘治十五年任沉靜
寡言博極群書作群賢資註詩學衍義及諸文
集於世

郭明郁四川長壽人由舉人宣德四年任本州
訓導學優才贍嘗與慕脩實錄秩滿陞國子監
助教

裴俊直隸來安人由監生永樂九年任本州訓
導學問優長訓誨有道秩滿陞戶科給事中
潘岳直隸陸安人由舉人永樂七年任本州訓

漢經明行脩士人欽仰秩滿陞監察御史

卷五

人物志

賢行

東漢

時鄭為
滎陽郡

服虔字子慎滎陽人作春秋左傳解賦碑誄書

記連珠九憤比十餘篇

晉

時鄭為
滎陽郡

鄭袤字林叔滎陽人父太楊州刺史有高名袤

少孤早有識鑒荀攸見之曰鄭公業為不亡

矣太祖中以袤為司空天子臨軒遣五官中

郎將諤坦就第拜授袤前後讓至十數謂坦

曰魏以徐景山為司空吾時為侍中受詔徐

公語吾曰三公上應天心苟非其人實傷和

氣不敢以死之年累辱朝廷也終於不就固

辭久之乃許薨謚曰元

唐

韋思謙字仁約鄭州人八歲喪母以孝聞及進

士第累調應城令擢監察御史嘗曰出使不

能動搖山嶽震摺州縣為不任職任中書令

褚遂良市地不如直思謙劾之及復相出思
謙青神令或吊答曰吾狷直觸機輒發何暇
恤身乎丈夫當敢言要地湏明目張膽以報
天子焉得碌碌保妻子耶累迁左司郎中尚
書左丞振明剛轄朝廷肅然進御史大夫性
蹇諤顏色莊重不敢犯見王公未嘗為禮或
以為議答曰耳目官固當特立鵬鷲鷹鷂豈
衆禽之偶柰何屈已以狎之復為右肅政故
事大夫御史相禮思謙獨不答曰班列固有
差柰何尚姑息耶致仕卒子承慶嗣

李日知鄭州人及進士第天授中歷司刑丞時
法令嚴吏爭為酷日知獨平寬無文致帝免
下囚死少卿胡元禮執不可吾不去刑曹囚
無生理日知曰僕不去刑曹囚無死法皆以
狀讞而武后用日知讞景隆初知政事初安
樂公主館第成中宗臨幸燕從官賦詩日知
卒章獨以譏睿宗他日曰卿向侍雖朕亦不
敢諫非公狂直誰能爾拜侍中先天元年罷
為刑部尚書屢乞骸骨許之日知將有請不
謀於家歸乃治行妻驚曰產利空空何辭之

遽日知曰仕至此以過吾分人亦何厭之有
既罷不治田園惟飾臺池引賓客與娛樂耳
開元中卒

韋承慶字元休性謹畏事繼母篤孝擢進士第
遷司議郎明堂災上疏諫以文明垂拱後執
政者未滿歲率以罷去夫構大厦濟巨川必
擇楠榦鯁若亟毀而敗則是庇朽木乘膠航
也臣謂陛下求賢之意切取人之路寬故一
言有合而付大任夫堯舉舜猶歷試諸難况
庸者可超輔相以百揆萬機畀小人哉書聞

不報後補天官郎脩國史凡三掌銓選授平
允議者公之時議草赦咸推之召使為之無
撓色說辭援筆而就未嘗著稿衆嘆其壯卒
謚曰溫

韋嗣立字延構與承慶異母少友孝每遇承慶
被毋管輒解衣求代毋不行輒自捶毋感悟
均為愛既第進士承慶拜鳳閣舍人武后召
嗣立謂曰爾父稱二子忠且孝堪事朕比兄
弟輔朕如而父言今使卿兄弟自相代即拜
鳳閣舍人長安中拜鳳閣侍郎同平章事尋

以李嶠唐休景言朝廷重內官輕外職每除
牧守皆許不行非道過累不得遣請選臺閣
賢者分典大州自近臣始後日先行以示群
臣后以本官檢校汴州刺史由是楊再思等
十八人悉補外景隆中拜兵部尚書同中書
門下三品嘗以刺史縣令治人之首比年不
知簡擇京官坐及聲稱下者乃典州刺史年
高不善刁筆者乃擬縣令言朝廷輕用人何
以治國願下有司加汰擇比諸曹侍郎兩省
三臺及五品以上清望官當先選用刺史縣

令所冀守宰稱職以興太平上不聽開元年
卒謚曰孝

常濟嗣立子也開元初調鄆城令或言吏部選
叙太濫縣令非人及衆入謝上試以理人策
對者凡二百有八人惟濟居第一擢醴泉令
後官至戶部侍郎為太原尹著先德詩四章
世服其典懋天寶中授尚書左丞凡三居之
濟文雅頗能脩飾政事所至有治聲

常弘景嗣立孫擢進士第累遷吏部侍郎銓選
公平貴倖悼其嚴不敢以私拜尚書右丞駁

正吏銓所除六十餘官不敢進資卽吏肅然
望風脩整楊虞卿以累下吏詔弘景識虞卿
私造門弘景厲言曰有詔按公尚私謁惶恐
去遷禮部侍郎卒時謂其以直道進議論持
正有守當時風教所及數倚賴焉目長慶名
卿云

鄭虔鄭州人天寶初為協律卽元宗愛其才欲
置左右以不事事更置為廣文館以虔為博
士虔聞命不知曹司所在訴於宰相相曰上
置廣文館以居賢者令後世言廣文博士自

君始不亦羨乎虔始就職初虔進細故事可
誌得四十餘篇蘇原明名其書為會粹虔善
畝山水好書嘗苦無紙於慈恩院貯楮葉數
屋遂日往取葉隸書歲久殆遍嘗自寫其詩
並畫以獻帝大署其尾曰鄭虔三絕遷著作
卽後數年卒虔學長於地里山川險易方隅
物產兵戎衆寡無不詳嘗為天寶軍防錄事
典故該博諸儒服其善著書時號鄭廣文在
官貧約甚澹如也杜甫嘗贈以詩曰才名四
十年坐客寒無羶云有鄭相如者師事虔謂

虞曰開元書三十年當改書十五年天下亂賊臣僭位公當扞偽官願守節可以免故虞念其言終不附

鄭珣瑜字伯元鄭州人天曆中以諷諫主文私高第元貞中為河南尹性嚴重少言未嘗以私托人人亦不敢謁以私既至河南清靜惠下賤歛貴發以便民時韓全義將兵伐蔡河南主饋運珣瑜密儲之湯翟以給官事百姓不知僦勞時謂治並河北張延賞而重厚堅正過之進門下侍郎同平章事李實為京尹

剝下務進奉珣瑜頭詰曰留府緡帛入有素餘者應內度支今進奉乃出何色耶具以實對方幸依違以免順宗立遷吏部尚書王叔文內交奄人撓攘政機常執誼為宰居外奉行珣瑜謂曰吾可復居此乎歸臥家不出士論高之數月卒謚曰獻

鄭覃珣瑜子為大儒以父蔭任諫議大夫憲宗時召為翰林侍講學士覃於經術該深純篤守正帝尤重之時李宗閔等執政以其與李德裕厚忌其親近遷工部尚書欲遣遠之帝

雅尚學頗思覃復召為侍講未幾宗閔得罪
遂拜同平章事以覃既名儒尋以宰相領祭
酒其為人清儉退約未嘗與人睨狎在侍讀
時每以厚風俗黜朋比再三為天子言故終
為相嘗以經籍利謬博士陋淺不能正建言
願與鉅學鴻生共力雙刃准漢舊事鏤石太
學示萬世法詔可乃表周墀崔珠等是正直
文刻於石既為相病進士浮誇欲廢其科言
於上曰南北朝不治以文采勝質厚也士惟
用才何以文辭帝曰純駁乃賦性之異也奚

特進士且設是科二百年渠何易乃止蓋其
性不喜文辭故也後以病致仕卒於家

鄭綱字文明初有奇志善屬文精於書法所交
皆天下有名士擢進士宏詞科高第累遷中
書舍人憲宗即位拜中書侍郎同平章事居
位四年罷太和中致仕卒綱以儒術進守道
寡欲所居不為烜赫事以篤實稱善明理學
世以耆德推之順宗疾甚太子亦病王叔文
與牛美入用事權震中外悼廣陵王雄偉明
睿欲立之時綱為翰林學士乃召綱草立太

子詔網不請輒書立嫡以長跪白之帝領之
乃定

後唐

王廷字世美鄭州人拜中書舍人知貢舉吏部
尚書盧文紀與故相崔協有隙時協有子頌
舉進士文紀謂曰貢舉進士當求實效無以
虛名昔有越人善泅生子方晬其母浮之水
上人怪問之則曰其父善泅子必能之若是
可乎廷退曰盧公之言為崔協恨其父遂及
其子明年選頌甲科人稱其公出五代史

宋

王德用字元輔鄭州人以父超任補官事仁宗
時位至樞密使公貌魁偉面色正黑雖匹夫
下卒閭巷小兒外至遠夷君長皆知其名識
與不識稱之曰黑王相公

李及字幼幾其先范陽人後徙鄭州中進士第
位至御史中丞真宗時公為工部侍郎薦張
錫才堪御史上曰李及清謹人未嘗有妄舉
按監察御史知杭州市泊集一部終身為恨
乖崖鎮蜀當邀時士女環左右終三年未嘗

回顧是其清節重厚又足以勵世云

元

霍繼基管城縣人累官至同知上都留守司兼大名路總管府階亞中大夫追封父太原郡

伯母太原郡君

行實見元明善碑

阿忽臺蒙古烈百氏鄭州人以軍功累官靖江總管府達魯花赤祖父父俱追封陳留侯毋封陳留郡夫人

李瑞字君祥少治經術有能文聲舉進士第皇慶間仕至河南行省員外郎以疾卒於官贈

嘉議大夫禮部尚書隴西郡侯

劉澤民鄭州管城人至元間以儒士任本縣教諭學行為一時稱首

朱融鄭州管城人世業儒術博極群書善屬文大德間以儒者授國子監伴讀歷上蔡縣主簿河南等處中書省令史

國朝

王彰字文昭世業詩書博學有才中洪武丁卯鄉試初授源士尋改吏科給事中歷刑部員外郎陞山西布政司左叅政入為禮部右侍

即復轉戶部右侍郎都察院左副都御史永樂十年晉右都御史巡撫河南符法嚴明人不敢于以私宣德二年卒於官見大學士楊榮揚士奇碑陳紀字南夫為人敦厚周慎蚤有文名登永樂戊戌進士入翰林為檢討遷大理寺副禮部員外郎卒

邢恭字克敬為人正直忠厚天性孝友宣德二年登進士第選翰林庶吉士授編修嫡母沒自京師奔喪晝夜兼行不入城郭既葬為廬墓所居之凡三年多有感應後有司上其事

朝廷表其門曰孝子云

節義

尹和家素寒微有姪蚤孤正值擾攘孤苦無依和鞠育收養厚於已子卒至成人合族百口三世同居貨財豐富子孫蕃衍太定間旌表門閭舊志

國朝

王氏本州程希賢之妻也希賢始以俊秀克學生洪武八年緣事卒於途王氏每痛其夫歿於患難時年二十一歲生一子名保住始三歲父母憐其少寡欲奪其志王氏泣曰姑老子幼設若

一身徇私而再適人則異日何面目見希賢於
地下乎父母卒不能移之所守益堅三十餘年
無瑕玷可議有司上其事旌表其門

冉氏民人趙二妻也年十八夫亡守節事舅姑如
禮卓異常人年七十五貞節如一宣德七年知
州史彬奏

請旌表其門

趙氏民人李讓妻也年二十一歲夫歿遺腹生子
名福舅姑欲奪其志誓不再醮衰毀盡禮形骸
枯槁奉養舅姑克供婦職鄉里稱焉六十餘年

無玷可議成化六年知州趙仲壽奏

請旌表其門

李氏義官宋芳妻也年二十一歲其夫病故止遺
一子名康甫二歲家貧伊姑憫其孤苦勸令攻
志迺以死自誓雖勤苦萬狀亦所甘心養姑教
子各有禮義四十餘年終始如一正德七年知
州童寬奏

請旌表其門

孟得田禧趙剛潘三俱本州人輕財仗義樂予好
施正統年間各出粟一千石賑濟貧民有司上

其事

詔旌表其門

楊氏廩膳生員王鍊妻也年二十五歲其夫病故
遺子方二歲家貧垢面紡績孝養舅姑訓子讀
書雖勤苦萬狀亦所甘心經四十餘年守節不
渝後

本州具申

撫按賜扁獎勵

科第

進士

唐

韋思謙

韋嗣立

韋承慶

李日知

鄭綱

鄭肅

宋

李及

元

李瑞

霍復中 狀元

國朝

陳紀永樂戊戌科授翰林院檢討

邢恭永樂丁未科累官翰林院編脩

李春宣德丙辰科歷官主事郎中寧波知府

馮廣成化壬辰科會試亞魁任桐城諸城知縣

李希哲成化甲辰科任山東恩縣知縣

曹來旬弘治丙辰科歷官御史武昌永州知府

孫綬正德戊辰科歷萍鄉江浦知縣陞都察院

經歷

王繼洛嘉靖辛丑科授大理評事歷寺正江西

按察司僉事

孫榮仁嘉靖庚戌科授任丘知縣

會試中式

曹來聘正德庚辰科

舉人

後周

閻繼鵬

杜質

王見素

元

霍復中

國朝

洪武甲子科

魯哲任本州儒學訓導

翟良任山西清源縣知縣

呂威任訓導

丁卯科

王彰累官都察院右都御史

丙子科

陳本

乙卯科

許麟

乙酉科

王暹

永樂辛卯科

陳紀 見進士

邢恭 見進士

道中任雲南都司經歷

周廉累官陝西按察司副使

岳山通州衛經歷

甲午科

王衡任直隸文安縣知縣

丁酉科

曹約

張璠任慶府護衛經歷

庚子科

傅銓累官至廣西思恩同知

癸卯科

馮振

宣德丙午科

弓蓋任安定縣學訓導

乙卯科

李春解元 見進士

張瑛任湖廣鄖縣學教諭

正統戊午科

黃福經魁任直隸威縣學教諭

辛酉科

馮本任直隸太倉衛經歷

丁卯科

黃錦任浙江上虞縣知縣

景泰庚午科

王瑤任陝西慶陽府學訓導

段清任郿縣知縣

天順壬午科

黃慶正統戊午科福之子任直隸常熟知縣

成化乙酉科

張政任陝西河州衛訓導

馮廣

見進士

劉鏜任陝西臨潼知縣

戊子科

白文晟任無極知縣

甲子科

李希哲

見進士

庚子科

馬文輝任直隸保定府推官

丙午科

曹宗璉歷知縣知州府同知都府經歷累官河

東運同

弘治乙酉科

楊懷任山西屯留知縣

壬子科

孫綾 見進士

傅民極任江都知縣

丁酉科

連紋任都事經歷官至黎平知府

段珎任涇府紀善

乙卯科

連世祿亞魁任直隸贛榆知縣

曹來旬成化丙午科宗璉之子 見進士

戊午科

蘇澍任陝西鞏昌府通判

辛酉科

袁文光任直隸容城縣知縣

李廷俊累官戶部員外郎

甲子科

常景春任山東泗水縣知縣

正德丁卯科

曹來聘亞魁

王汝衡任直隸欒城縣知縣

庚午科

連登成化丁酉科紋之子任直隸魏縣知縣

馮應元

癸酉科

劉萬任山西絳州知州

嘉靖壬午科

曹來賓亞魁任鄒平米脂二縣知縣

常深任直隸永平府通判

乙酉科

孫漸弘治壬子科縵之子

甲午科

王繼洛永樂甲午科衡之孫 見進士

庚子科

盧煌

丙午科

孫榮仁經元 見進士

貢士

田嘉洪武年貢授江西新喻縣知縣後陞江西按

察司僉事

劉徽洪武年貢累官都察院右僉都御史

張翼洪武年貢累官通政使司右叅議

胡敬洪武年貢累官禮科給事中

孫翥洪武年貢累官兵科給事中

張寶洪武年貢累官禮部員外郎

鹿琇永樂二年貢任部郎縣知縣

羅亨永樂三年貢任湖廣黃州衛經歷

李現永樂四年以楷書貢任大興縣知縣

武能永樂五年貢任山東寧海州知州

袁慶永樂五年貢

張潛永樂六年貢任山西定襄縣知縣

李謙永樂六年貢任直隸滑縣知縣

洛源永樂七年貢任陝西富平縣縣丞

華堅永樂七年貢

史質永樂八年貢任桃源縣縣丞

李進永樂九年貢任府軍後衛經歷

趙永永樂九年貢任陝西隴州判官

關俊永樂十年貢任山東濟南衛經歷

戚譽永樂十一年貢任光祿寺署丞

華茂永樂十一年貢任山東剡城縣主簿

馬良永樂十二年貢

趙凱永樂十三年貢

楊春永樂十四年貢任四川資縣知縣

劉貫永樂十四年貢任上林苑監典署

朱謹永樂十六年貢

陳林永樂十七年貢任四川漢州知州

司鵠永樂十八年貢任沙河縣知縣

王勇永樂十九年貢

寇讓永樂十九年貢任千戶所吏目

劉勉永樂二十一年貢任千戶所吏目

黃貴洪熙元年貢

楊節宣德二年貢

李郁宣德四年貢任羽林衛經歷

張玘宣德五年貢任寧夏衛知事

鄭雍宣德六年貢任山東樂陵縣學訓導

史榮宣德六年貢任陝西千戶所吏目

劉鳳宣德七年貢任陝西寧州知州

朱敏宣德八年貢任鴻臚寺序班

胡信宣德八年貢任浙江麗水縣縣丞

袁智宣德九年貢任平陽府經歷

李瑤宣德十年貢任衛經歷

宋徽正統二年貢任潁州知州

金勵正統四年貢任直隸淮安府經歷

房鼎正統七年貢

孫太正統七年貢任山西屯留縣縣丞

鄒敏正統十年貢任光祿寺監事

孟春正統十一年貢

張麟正統十二年貢任遼東安樂州知州

李恭正統十三年貢任廣東廉州府檢校

劉敏正統十三年貢

徐徵正統十四年貢任陝西甘泉縣縣丞

胡潛景泰元年貢冠帶終身

王傑景泰元年貢任山西太原府經歷

劉輝景泰二年貢任山東平原縣知縣

蘇鑑景泰二年貢任陝西富平縣知縣

朱能景泰三年貢任陝西澄縣學訓導

尹傑景泰三年貢任陝西寧夏衛經歷

馮廉景泰四年貢

孫昭景泰五年貢任陝西平涼府知事

楊禮景泰七年貢任陝西金縣知縣

劉鑄景泰八年貢任山西馬邑縣學訓導

杜禧天順二年貢任山東維縣縣丞

耿明天順三年貢任陝西肅府引禮舍人

劉榮天順四年貢

弓頰天順六年貢

左輔天順七年貢任州同知

任太成化元年貢

白斌成化三年貢

劉述成化四年貢

帖讓成化五年貢任揚州府照磨

傅相成化七年貢任南宮縣縣丞

祝壽成化八年貢

楊祐成化九年貢任直隸通州學訓導

王恭成化十一年貢任山東臨淄縣學訓導

岳昇成化十二年貢任千戶所吏目

張英成化十三年貢任山東太安州判官

李臻成化十五年貢任四川資陽縣主簿

王鑾成化十六年貢任直隸沐陽縣學訓導

鮑滋成化十七年貢任直隸曲周縣學訓導

李祿成化十九年貢

李文溥成化二十年貢任湖廣武昌府知事

張士瓚成化二十一年貢任直隸定興縣主簿

王宁成化二十三年貢任直隸定興縣主簿

古文弘治元年貢

李倫弘治二年貢

李儀弘治四年貢任直隸曲周縣學訓導

張簡弘治五年貢

呂純弘治六年貢

田浩弘治八年貢任山東萊蕪縣學訓導

張銳弘治九年貢任雲南楚雄縣知縣

劉玉鉉弘治九年貢任四川石碛司經歷

袁端本弘治十年貢任山西隰州學訓導

鄒淵弘治十一年貢任山西孟縣學訓導

李希賢弘治十一年貢

于賓弘治十二年貢

邢宣弘治十四年貢任山東萊陽學教諭

李表弘治十五年貢任直隸密雲縣學教諭

宋蘭弘治十六年貢

劉瑾弘治十七年貢任封丘王府教授

黃唐正德元年貢

楊輅正德二年貢任直隸薊州學訓導

杜儼正德四年貢任山東莒州學訓導

孫保之正德六年貢任兵馬司副指揮

鮑金正德八年貢任山西隰州學訓導

劉金鑑

李鎮

黃寔

劉睿正德十年貢任山西朔州學正

康志賢正德十四年貢任山西屯留縣學教諭

傅燁正德十五年貢任山東城武縣學訓導

楊怡

王賓賢正德十六年貢任趙府教授

藍田

海德深

張文運嘉靖二年貢任陝西華陰縣學訓導

孫佑之嘉靖四年貢任陝西耀州學正

燕良嘉靖五年貢

李思孝嘉靖七年貢任陝西山陽知縣

程慶嘉靖九年貢任直隸薊州學訓導

苗穆嘉靖十年貢

孟翰嘉靖十一年貢任陝西清澗縣學訓導

劉錫嘉靖十二年貢任山西垣曲縣縣丞

王旻嘉靖十二年貢任直隸藁城縣學訓導

宋績嘉靖十三年貢任江西撫州府通判

梁士儀嘉靖十三年貢授直隸高郵州判官

鄒汝極嘉靖十五年貢任山西朔州學正

劉振嘉靖十六年貢任陝西米脂縣學教諭

沈中立嘉靖十七年貢任山西吉州學正

張冲嘉靖十九年貢任山西太平縣學訓導

閻科嘉靖十九年貢任直隸樂亭縣學教諭

馮應龍嘉靖二十年貢任直隸歸城縣學訓導

劉卿嘉靖二十年貢任山西五臺縣學訓導

白思義嘉靖二十一年貢任山西猗氏縣學訓導

程九萬嘉靖二十一年貢

戴浩嘉靖二十三年貢任遼東寧遠衛學訓導

劉富嘉靖二十四年貢任山東沂州學訓導

趙士揚嘉靖二十五年貢

曹國翰嘉靖二十七年貢

戴洛嘉靖二十八年貢

張畧嘉靖二十九年貢

李守田嘉靖三十年貢

李景和正統十四年援例入監

張善正統十四年援例入監任保定衛經歷

王繼正統十四年援例入監

把讓天順六年援例入監

宋道天順六年援例入監

王珏天順七年援例入監

楊信天順七年援例入監任衛吏目

張學天順七年援例入監

陳禎天順七年援例入監任襄府審理

張紀天順七年援例任婺源縣縣丞

張灝天順七年援例入監任獻縣縣丞

張瑜弘治九年援例入監

宋達弘治九年援例入監

宋琦弘治九年援例入監任樂平縣縣丞

安寅弘治九年援例入監任歸安縣縣丞

燕志高弘治九年援例入監任山東即墨縣縣丞

道高弘治九年援例入監任寧海州判官

徐守福弘治九年援例入監任潼關衛經歷

徐守祿弘治九年援例入監任登州府通判

馮寵弘治九年援例入監

劉淵弘治九年援例入監任宛平縣主簿

馬天瑞正德年援例入監任山東鰲山衛經歷

劉汝暹正德年援例入監任山東臨邑縣主簿

曹來咨正德年援例入監任應天府句容縣主簿

曹來崇正德年援例入監

周南正德年援例入監任山西洪洞縣縣丞

陳金嘉靖四年援例入監任湖廣華容縣主簿

李中科嘉靖四年援例入監

孫東山嘉靖年援例入監

劉可貞嘉靖年援例入監

李中元嘉靖年援例入監

李中節嘉靖年援例入監

劉汝進嘉靖年援例入監

孫東魯嘉靖年援例入監

張涵嘉靖年援例入監

魏崑嘉靖年援例入監

于崇元嘉靖年援例入監

卷六

雜志

寺觀

崇聖寺在州北拱辰門外東北初建於宋熙寧間
元季毀於兵燹

國朝洪武十五年僧正仁壽仍故址重建

開元寺在州治之東唐玄宗開元年初建

國朝永樂十八年僧明福重建

曹固寺在州東南曹保元至正二十八年僧智惠
重建

列子觀在州東三十里。荆建無考。蓋列子鄭圃田人。亦有道之士。故後人立觀以祀之。弘治二年僧成祐架造一新。

古跡

夕陽樓在州治西。今廢。有唐李商隱詩尚存。石刻候月臺在州治後。今廢。有魏石刻候月臺三字。今尚存。

浮波亭在州後。有池。宋陳堯佐判鄭時建。今廢。石碣上刻浮波亭詩五首。今尚存。

僕射陂在州東。後魏文帝賜李冲因名之。

飛白安民碑二字。嘉祐二年王贄出知鄭時模刻。乃宋仁宗皇帝御書所賜。今在州廳後甬道西。仙。

列子者鄭國人也。名禦寇。與鄭繻公同時。其學以黃老為宗。自言師壺丘子林。而友伯昏著書二十篇。名冲虛道德經。見古史。

鄒宿任鄭州監酒。居官公正。惟供養真武侍奉。謹恪。未嘗以諂諛欺誑之事。祈求而平日所為。亦皆善道。故九州民有水旱災疫。遍祈禱。諸處神祠無不應。若鄒齋沐於本家真武。前祈禱皆獲靈。

驗人皆謂鄒宿曾悟聖教冥契神靈故鄭州陰
受其賜忽一日鄭州於日午間天降風雷煙霧
四起於北門裡黑霧盤旋降下無蓋銅棺一付
虛空中但聞音樂嘈囂自守倅以下至於百姓
盡皆易衣棺外狹內寬一無所不容最後鄒監
酒盛服而來方入其棺忽震響下降其蓋輕舉
而上仙韶鶴唳瑞氣天香藹然不散棺冉冉向
北而去有司以其事聞於朝行下保勘後監酒
果出神到內殿辭云臣蒙天府差充北極壽限
曹副判官時寔慶曆二年三月初五日也

事見勸善書

釋

唐

鄭牧卿鄭州人舉家念佛開元中病篤有勸進魚
肉者確乎不許手執香爐願求往生忽異香蔚
充庵然長逝舅尚書蘇頲夢蓮池開牧卿坐其
上

藝文

宋

欽奉堂記

有宋大中祥符四年真宗皇帝御宇之十載也四

夷面內萬方砥厲年穀屢登瑞物出秀昆蟲草木
罔不楙遂徇東人之勤請既告成於岱宗因西土
之望事乃展禮於郊上皆詣闕祝童者五帝不得
已而俞之及齊輅啓行再宿而次於鄭千乘萬騎
溢郭填郭後后之民共承相慶歡聲和氣雷動雲
浮千里之途壺漿襁負亦既瘞土翁受蕃釐駕言
還京復茲駐驛賜酺一日就見百年曠代之儀靡
不畢講於是周覽原隰俯詢風俗爰摘膚藻發為
聲詩永懷先賢申戒有位聖人之作豈徒然哉爛
若三辰之迥明鏗若八音之合奏昔漢武帝橫著

辭典方之我朝彼多慙德迹臣建議願刊翠琰以
示方來石取諸他山成之不日刻畫稜婉勢含飛
動垂之千載其不朽矣先是立於便廳之南雖覆
以亭而制甚陋歷年滋久風雨不庇無擇蒙恩補
外來掌鄭人下車十旬始謀遷置得地於黃堂之
背度材面勢作為新堂巋然其崇穹然其深軒窓
門闥一皆取稱且榜之曰欽奉螯螭下土如珪斯
植其亦庶乎尊帝王之制聳郡國之觀也夫臣之
事君貴於不黯愚者之慮不在茲乎謹用真書識
其歲月云

治平三年冬十二月庚寅龍圖閣學士朝散大夫
尚書刑部郎中知鄭州事上護軍饒陽縣開國伯
食邑八百戶賜紫金魚袋祖無擇撰

五言四韻詩記

上作詩五言一章四韻賜端明殿學士魯公亮知
鄭州寵其行也臣公亮拜首稽首以受寶於其家
越明年十月辛卯乃發石摹刻立於州廳之別廳
庶幾與三辰並昭揭諸無窮於是自奏其語以記
之曰臣聞昔者舜用庶尹之諧作歌以敕天命究
於元首股肱相成之叙其臣有夔臯陶者寔對颺

之事載於書為萬代法迨後帝王必習彌文矢賦
寓興各繫其一時之澤而其臣亦莫不推明贊宣
信之天下耳目傳至於今而有虞氏之美獨為稱
首恭惟體天法道欽文聰武聖神孝德皇帝陛下
天縱元聖包仁貫義然猶兢兢亶亶退託未寤師
古用衆日考大中故言行所造必極於教化之端
而夷夏臣民翕然知納於律度今詩之作也所以
褒眷侍學之臣而寵其出宿因明藩屏之寄職儀
之數而慰其長人卒告諸論思可否不以內外為
間而勅其自效蓋天子尚文隆儒勤政樂諫四者

天下之急務也而一章之中微指具焉固已超軼漢唐而獨配於有虞氏之美然其不佞之臣魯亡以髣髴近世諸儒况敢追躋臯陶等而能望清光稱聖德哉竊伏自念待罪勸講十有三年始以外朝佩服出入殿闈而寢尋恩渥遂厠被垣禁林法從之例遘疾淹阻逋曠朝請尅殘甫起乞州自便豈意去闕之日重集非常之榮熏心汗顏夙夜震惕願身為犧牲尚何足以報萬一也上方益探六經之術詳而措諸事事之幾其巨細先後要皆可以燕子孫法萬世大繼有虞氏之烈也臣敢貪自

蓋其不佞而獨思聖文不卒布於天下使民或闕其傳以累大史則又重於素餐而冒褒寵之辜也故託於此畢其愚忠云皆

至和元年九月己酉日端明殿學士朝散大夫尚書右司郎中集賢殿脩撰知鄭州軍州事兼管內河隄勸農使同群司事柱國廬陵縣開國侯食邑一千一百戶賜紫金魚袋臣魯公亮記

飛白安民字記

皇祐五年冬皇上踵三代漢唐之舊斥大王畿之制將以內尊京師外控萬國乃詔鄭滑曹許陳為

輔州建轉運使以領之臣寔愚淺首被其選越明年冬上計都下入對便坐天庭借采德音敦喻是晚遣中使就賜飛白安民二字大哉聖人勤政慮民加惠於一介之臣以獎以勗如此之至也臣聞臯陶曰在知人在安民又曰知人則哲安民則惠惟帝其難之夫以舜禹之聖而臯陶為之臣其相與講求治道猶曰安民之難後之君天下基太平舍是宜無大者焉恭惟體天法道欽文聰武聖神孝德皇帝陛下仁明睿知諏經憲古聲教所被涵乾冒坤而且夙夜兢兢業業思安天下之未安此

舜禹之用心也惟是承學之臣材且單疎其何以望閣下之清光然敢不對揚休命寅夕勉勵庶幾宣布惠澤副聖君愛育纖悉之意臣又聞飛白之作基於東漢派於曹魏盛於李唐公原踵華流風相高維皇右聞垂思藝苑翰墨之法詎惟天成故夫七章六體竒行篆籀罔不畢貫其極若乃揮毫拂素天華照爛形逸趣遠入神訂妙固足以跨軼前古為萬世絕範豈臣能效形容稱贊之萬一也昔馬周被凌雲之賜劉垺託登牀之寵彼特一時之事非所愛民而勉治烏足為後人道哉臣拜命

後二年領州於鄭敢用闢黃堂廟翠珉窺天侔采
移布宸筆庶揭之天下視聽與日星並永且使後
人之臨政者知陛下愛養元元之心不敢自肆而
有以警飭亦臣子報國之一端也臣贊謹記

嘉祐三年八月十五日樞密直學士左諫議大夫
知州事兼管內河隄勸農事使及管勾群牧公事
提點牛羊司外群牧上護軍太原郡開國侯食邑
一千戶賜紫金魚袋臣王贊摹勒上進

王武恭公神道忠清之碑

夫處富貴炎炎之勢必謂之顯人矣有其位無其

德可謂顯乎曰不可也生如是死則泯滅無疑固
非有骨化黃壤名振後人而無已者其故何哉非
行義著見事業設施聳動當代則孰能如斯徵其
令名非獨不忘而已至有百世之後猶蒙褒表以
勗士民况名烈如存耳目相接者乎惟魯康公既
沒四絕其子武恭公將葬矣 皇上手篆忠清二
字使勒諸墓碑之額且念武恭公所以輔位有勞
自有不懈者亦惟武康教育訓導而然又念武康
公始能竭力事 太宗晚受遺詔衛先帝忠蓋勲
舊可謂至矣頃嘗念魯宣清公銘其墓碑是 皇

上手篆忠清使刻於螭首夫江漢武帝之詩周宣
王能用召虎皇父咸追其世功今 皇上褒武公
之終以及其考亦宣王之志歟於乎功惟圖舊君
之仁也宣勞食德君之美也使忠且義父之賢也
惟賢是似子之孝也父子一動而四者形焉使天
下為人父者知所教其子為人子者知所事其君
此其報有稱固不爽於先王之法治豈可以無傳
於後故謹書其畧焉

嘉祐三年九月初七日翰林院學士尚書吏部員
外郎知制誥韓絳記

元

管城縣廳壁記

昔周封叔鮮於此在春秋隸鄭秦罷諸侯俾為三
川郡支漢氏因之晉氏郡焉降自隋曰管曰鄭以
刺史治是邑也皆郡之郭邑焉歷宋迄金咸亦如
之皇元起運亦仍故制未嘗變革斯邑左汴右洛
南許北衛其奔走刺史之命錢勞使者之後繁劇
倍他邑非才明者宜莫勝任然而肇自我

朝建官設法以來為是邑者幾何人斯惜未嘗紀錄
以詔後故政教德業今皆不獲詳知大德三年間

縣他李公克讓主簿李公恒適蒞是邑茲二公者
端平樂易誠信篤厚寬而不猛簡而克恭事無易
艱優游悉辦下車之初首興庠序敦化務農不為
邪苛澄汰積弊務以誠實御下故弗二祀納民於
和帖然以夷熏然以熙黃髮童胤風靡服化二公
以解舍卑陋詢謀達魯花赤脫烈海牙慨然協意
各以秩緡售瓦木萃工師或仍或新匪怠匪亟期
月而役師奏功崇峻暖閣正廳翼列席司碑樓門
垣井焉以條鼎焉以新式壯厥邑嘉績固多未易
枚舉蓋三公皆君子也凡所作為共唱和之故不

勞力獲濟其事是其同僚之相得可喜也故勒石
置諸壁仍以三公及前任官姓氏列左方皆

大德六年六月初三日
前管城縣儒學教諭孫思
義記

鄭州重脩廟學記

在昔有學而無廟後世因廟以立學蓋學乃作養
人材之地廟誠釋奠聖賢之所非學無以考德問
業非廟無以觀禮習容廟學相須茲寔明人倫厚
風化古今為政之先務也奉寧有學厥惟舊哉由
宋歷今迄於聖朝而興廢盛衰雖有常數然天未

喪於斯文備為之官靡不接跡崇寧己巳振威毛
公太和初元知州賈公正己丑吾古孫公至元二
十六年長官黃廷佐累加脩復大德癸卯郡守劉
奉訓招集生徒教養有法逮迨祐辛酉奉寧楊公
力為興建輪然真然罔不畢備寒暑推遷歷一十
八載梁摧棟撓瓦解土崩至順庚午秋八月上丁
監郡縣守令僚佐觀感興嘆共思一新乃同捐資
俸為倡郡之縉紳從而和之生徒閭閻各輸所有
富者以資貧者以力故得未逾半載咸卒全功正
殿兩廡講堂兩序易弊以完代朽以堅若神門若

築道若七賢堂若靈星闕閱悉皆丹雘粉飾而又
繚以周垣甃其階阼顧雖規模仍舊而其氣象勝
前始事於庚午之秋落成於辛未之夏學正高良
羽與有力焉龍石既具巧文以記歲月予魯諸生
也備員守土義弗敢辭縱畢竭固陋不足以形容
盛德之萬一乃進者舊歷諸生而謂之曰今廟既
嚴矣學既成矣凡在郡民當父勸其子兄勉其弟
為師者知所以教為弟子者知所以學始焉誠意
正心終焉致知格物蘊之而為德行行之而為事
業以知行並進之力成脩齊治平之功堯舜聖君

中古吾民毋徒抄撮要畧以資舉習三物賓興道
因人盛顧不惜歟後生勉旃罔俾英賢專美前代
時官名姓具於碑陰至順辛未丑月癸卯日翰林
脩撰奉政大夫知汴梁路鄭州兼管勸農事知河
防事東平霍希賢記

鄭州重脩廟學記

明主之所先庸主後之良吏之所急俗吏慢之庠
序學校明主所以養賢儲才化民成俗之先務也
有國有天下者孰不欲令行禁止君子愛人小人
易使忘身殉國親上死長政治和平而囹圄空虛

禍亂不作而賢能輩出國勢尊隆萬邦咸服然而
卒不能從其所欲者何哉蓋不知清出治之源廢
德教而任刑罰棄禮樂而專法令踵戰國暴秦之
餘習忽唐虞三代之至治區區以簿書期會為先
務職此之由也唐虞三代之政固多教條大經大
法莫先於庶而富富而教亦京師縣邑家術鄉黨
皆有學故能官得其人職無廢事風俗成而國祚
永迤及列國一時卿大夫尚能以禮維持其政鄭
之有邦間於秦晉齊楚之强大子產以君子之道
修已事上訓民治事見稱於孔子昭昭於史冊當

時至今皆謂鄭有人焉僑之歿千八百年至元丁
亥我朝貴臣陌魁尚書公子之脫脫湖北道宣慰
副使東昌節婦馬氏夫人之子黃廷佐君卿同治
是邦革前政白科之弊墾闢荒蕪務農種谷發榮
陽炭山之利浚汴水以通東南之舟楫勸孝弟化
奸凶百廢俱舉乃曰我朝啓造區夏冊試多士選
者復其家世世無有所與在在廟像孔聖建學立
師作養賢俊訓導閭里內立集賢翰林院以待茂
異以尊養耆德國子監以教貴族子弟之俊秀者
急先務也鄭州廟學卑陋乃尔吾二人寔負其罪

乃即漢永平之故基復脩而重起之聖宇賢廡師
位生齋下及井竈備具一新經始於歲之春二
月落成於明年之秋七月躬率僚屬郡士致禮常
祀鄭人趨拜祠下瞻仰嘆嗟同聲相應曰吾二賢
侯為國為民忠厚勤敏忍惜一言以紀以德以功
勸來者而垂無窮乎僉曰諾攄誠拜狀以文來請
謹因鄭人之詠歌而為之詩曰

為政有三 庶富而教 弗庠弗序 從厥攸好
臣不知忠 子不知孝 忠孝兩忘 鳥獸同道
賢哉二侯 布政優優 以善養人 廟學復脩

彝倫既明 則民不偷 熙熙鄭俗 禮讓交遊
異邦之治 簿書期會 抵冒頑嚚 苟勉無愧
此善波惡 學興學廢 緩急後先 惡則倒置
我銘我詩 鄭人之辭 二侯在官 父訓毋慈
二侯他適 鄭人去思 刻石廟庭 曰拜其儀
至元二十六年歲次己丑十一月吉日胡祗通記
鄭州興學記 李師聖

而能識也胡為獨稱舜能察於人倫為聖人人倫
之至何哉蓋真知者為難而寔所知者為尤難至
於知之至而行之盡者天下一人而已矣傳有曰
述之事父遠之事君則忠之訓蓋得所以事父之
道斯得所以事君之道矣究竟至道其揆一也如
事父母能竭其力事君能致其身之云人倫之重
莫之或先顧以賢賢易色為首稱者蓋男女人之
大欲而凡耳目口鼻四肢之求逞者皆是物也一
有所向氣以事用則汨於欲且沒於利利即人情
之所欲也欲勝於理則本源失矣其何以為孝與

忠之地乎彼懷利以事其君父者宜末流之徇不可勝言也春秋弑三十六大抵皆見利而動蓋所謂不奪不饜者歟抑聞之民生於三事之如一為人臣者亦何嘗不致其身為人子者亦何嘗不竭其力特以常者言其家變者言其國寔互文以相明耳嗚呼世降俗薄其能不有其身以徇所失者茫茫四海之廣寥寥百年之久僅可以指數然匹夫匹婦間有盡其分者要亦不能擴而充之推而達之必矣此建國君民之所以以教學為先也嗚呼使道學復明治化大行為諸侯者誠死社稷為

大夫者誠死宗廟等而下之家守義而人秉節身可殺而志不可奪其萬世不拔之基真若倚南山而坐平原也孰謂崇儒右文立教明倫之舉為迂濶也哉鄭州學之立亦有年矣作郡者復構講堂大之倫矣然雖構其空寂不知其幾年矣雖有明倫之堂而無明倫之人可乎知州劉奉訓倡始於前知州許奉訓同知王承事等繼終於後進義副尉管城達魯花赤狗不花等又相與輔相之僉曰學校國家大事不可緩也我等力為之於是增廣

生員重加勉勵學校大興四方遊學畢至而其師之所以嚴教弟子所以向學所以學者一以小學四書為課其所以知趨向而期待矣本道僉憲董公按部於此重加賞異而師生率為之奮激先名後實法當然也比以記文見屬乃宣暢展布以發之亦公之氣象爽邁有發動云耳默然良久於是乎書

大德七年十二月初四日

子產廟記

朱融

周德削皇綱弛紊列侯據鼎峙爭雄尊假仁營武

伯用是畜人孰周尊矣心孰德用矣雖用康靖國匪德必帛以治匪帛之治且未可帛治之遵匪人又誰可得人則國迺休帛迺立民迺懷惠以寧非大國然小國亦然日鄭偪秦晉楚間虎眈眈如危有不可保之憂然而社稷完蒸庶艾得非人歟子產叙鄭大夫列迺恭迺惠迺敬迺義厚忠節儉浮侈崇述天視弗斁鄉校俾君人攸叙刑政得中茲雖秦晉楚大國敵國小鄭也故微子產國將若之何傳曰國無以為寶惟善以為寶非歟溱與洧有城其陽圯而址且存實古鄭封國建更縣治也隸

鄭之州有元割茅割而隸鈞邑猶新鄭名管之鄭
君封叔鮮繇州治邑管隸東郭有宮神霄宋構之
祁延世祚燬於兵奔榛為墟承訓石氏以地入之
官監縣拜不華廟營子產力經藏不暇食佐以管
尹曹世英貳牧李恒得鄭巨室大夫士之緡構殿
三楹延袤適宜翬葦中規中額以儀髣飾其戶至
迨其壁門直於丙墉崇四周甫期落之大德乙巳
秋於戲基宮廟賢宜舉頌善國禁鄭會人益叅惑
宜乎構歟書云君子惠人遺愛豈徒哉言非譽也
王將益恩黽勉志恢復者如之人也之人也廟葺

揭虔懣戴誰弗可矧管違鄭纒三舍邑屬棟接政
聞交達卜築是宜雖然子產物身餘千歲廩廩君
子德讓遺風情若叅之日俾人不自知警省蹈跡
踐軼誠弗係廟有無廟盛矣亦豈眩麗媿世耳目
哉後凡苟容咨睢慮職耗亂者因物起興將有焉
眡儀拂德駿衆自賍者刻移訴牒亦將有焉夫昭
昭靈貺陰庇守牧如古鄭政遺吾民惠者此又出
管人覬覦之所夕也承訓石氏竊謂融曰監縣拜
不華遵應明詔為前政所未為政槩知矣且無幾
去世歲更三閏矣繼政述事又得子朶見別互蹈

襲前徽若然者載諸事揭諸石是宜子管人業儒者知鄭莫子若也子宜記之於辭焉古君子德故無墜聖典載構政賢見遠而易荒矣融讓弗見愛故謹書之石

重脩武安王祠碑

閔王有廟尚矣當漢祚將終群雄爭長天下不復知有漢王以蓋世之資挺生於解崛起草莽涿郡會張翼德義歸先主拜為兄弟誓以生死每客至侍立終日無倦盡弟秩焉遽起恢復之論王之千力萬氣奮不顧身所向無前敵號萬人威振華夏

不以操之爵賞禮幣易其節力扶先主成其帝業王書善春秋武兼韜畧榮尊顯於生前歷代褒封自公侯而王登崇極享血食於身後其在天之靈如日星之麗天源泉之在地無幽不燭無遠弗屆上自國都下及郡邑以至里社鄉遂無貴賤貧富咸依而行匪家喻戶曉罔不立像設廟而祀之每遇旱乾疾疫消潔祈禳應之如響其報賽之盛何可紀極雖傾資破帑猶懼未稱奠獻之儀各以牲醪香帛相尚歲以為常亘千百年人無異議嗚呼王之勛德在人可知前宋解鹽池涸俗傳蚩尤神

作耗遣使告焉而復肇封義勇武安王追我
國家有事郊畿交兵之際兩見美髯絳袍赤驥將督
戰以致勝因加顯靈義勇武安英濟王極其徽祿
以答神休仍

勅有司歲時致祭鄭之為郡古侯國也俗厚人淳有
子產之遺風焉郡之東南陬建立王廟甚壯嚴餘
百年上兩傍傾摧弗楮麟臺董侯來守是邦以善
為政更尊是神適值旱躬率寮吏耆艾蠲吉禱於
廟庭克日雨時大有秋候觀其祠宇幾廢又闕碑
誌意不悅甚與寮吏謀諸耆宿曰革故圖新以補

其闕可乎僉曰可輒鳩役募工運甃伐木俾正殿
金碧丹堊煥然一新以兩耳非度易構神殿為兩
序東西相向各三楹焉於是采石賈峪欲樹龜龍
豐碑於獻殿之陽予適客是郡有義士梁文質府
掾劉仁義以董侯之故求文於予以示不忘固辭
弗獲不惟錄其起廢之勤又當欽之

聖朝褒寵徽號之隆併勒諸石又係之以銘云

嵩山之東

溱洧之澣

卓彼王宮

在鄭之圃

弊而弗興

多歷年所

棟宇傾欹

莫蔽風雨

我侯之來

久廢斯舉

早乾疾疫

微王孰主

有禱其應 酬報旁午 奠獻既陳 有事神府
黍稷馨香 以實簋簠 玄酒大羹 以列鼎俎
登降有儀 載舞載舞 昭然靈貺 以篤斯祜
歲乃登禳 民物與與 佐我

皇元億萬千古

至正六年翰林編脩

國史泰和鄭執中撰

唐忠臣李衛公廟記

凡於國於民立功立業竭忠抗節執義尚讓血食
一方久而不墜非命世之大才其孰能與於此乎

記曰能禦大菑能捍大患以死勤事以勞定國則
祀之此之謂也昔狄仁傑明經入仕累遷冬官侍
郎持節巡撫吳楚數淫祀千七百房獨留夏禹太
伯季札伍員四祠而已蓋功濟於世道尊於人而
致然也惟鄭之東有廟巋然奠茲高壤旁連千室
之邑俯瞰萬頃之陂迺唐李衛公之祠公諱靖字
樂師京兆三原人也隋大業末為馬邑丞及唐興
高祖太宗削平天下攀龍附鳳紀功帝籍定國捍
患公兼有之史筆之光爛如日星沒而廟祀宜無
廢矣後唐天成間冊贈太保暨晉天福中旌以王

封宋建隆咸平景德間增新二殿繚牆廊廡自茲
歲久頹摧頗甚建明昌庚戌秋七月正議郭公仰
承綸命更治茲郡敬謁是祠觀棟宇支撐榱桷傾
墜塗壁剝落瓦甍墊裂慨然加嘆公意存焉越明
年六月勾當河防公事回百姓郊迎公駐車謂曰
山東河北地方千里自春徂夏旱魃為害苗稼一
空遷徙之民相踵於路遠之唐鄧汝蔡間至鬻子
而食者獨女之鄉時豐晏居汝知之乎汙非忠烈
王之潛祐陰益哉怜其祠屋日毀其孰肯構我能
扶之不旬餘有郡民崔永等建議完葺公聞之喜

助錢三萬上百人撫以甘言以壯其氣繼而官屬
施各有差厥後不雨苗將稿矣公齋戒潔誠晨往
禱曰廟貌尊嚴一邦瞻仰如歲之豐凶數不能易
三日視之少雨其或不然人何以仰之神之聽之無
作神羞雨不逾期是以官吏相與慶於庭商賈相
與歌於市農夫相與狎於野黃童白叟喜形於色
咸相告曰此吾太守誠所感也歡呼拜謝於太守
之庭者不可數記太守顧曰非我之力若等致耶
自茲闔境聽聞靡不感戴爭先獻施市居者財野
居者木工者窮其技拙者效其力朝而往慕而歸

甚於營私不日告成昔之廢者今以興昔之傾者
今以壯簷楹棟宇丹青繪像表裏一新爛然可觀
欲求其傳刊諸翠琰以示來者

明昌二年歲次辛亥十一月丙午朔十五日庚申
登仕郎鄭州儒學教授兼提舉醫學馬琬撰

裴晉公碑記

蒲公文苑同知鄭州之三年民有利病多罷行之
奉宣詔書崇秩禮祀脩三皇先聖廟建鄉賢祠九
古忠烈顯聞之士塚於鄭者皆位以祭汝南獄疑
省檄即訊閱汝陽雜詠有云裴晉公墓在鄭之城

南事已言歸訪諸故老曰林錦店居南二里許有
碑陽有陂公廟不聞有裴晉公祠獨喜曰裴陂聲
相近於是擇更事吏往視得石刻毀垣下拭而讀
裴公祠迺宋樞密王欽若所建明日躬往謁焉顧
視周圍以求墓所獲小碣云墓去廟三百九十步
即往索之翁仲羊虎敗臥草莽距廟垣舉武之數
不失尺寸二塚離立東西雖未定知晉公之處其為
裴氏之藏可謂傳信無疑而知在左右者猶魂氣
之無不之也迺命重脩故廟加封垣禦樵牧擇民
謹愿者曰趙成寬其戶後俾以餘田十有八畝使

稼之以備脩飾時灑掃焉徵記於浚儀吳炳且請
大書裴晉公之神道若晉公之事出處具載史傳
民之祀之豈不以有勞定國而功施於人歟同知
公既有惠於鄭人復能因故詠以得前世顯臣之
祠之墓於湮沒荒廢之餘以無負明詔所以厚忠
臣烈士之意可謂知所務矣是不可以無記公名
理翰初以進士高第除同知寧都州今官文林郎
云翰林吳炳書並篆

黃公德政去思之碑

夫德之為言德也行道而有得於心也政之為言
正也所以正人之不正也蓋居上臨下者以是可
以美教化移風俗厚民生決庶務然而古今之吏
聰明才俊者不為不多苟能致志循於此理者或
寡矣其有奮然專心誠意柔不茹剛不吐直而溫簡
而廉寬猛相濟夙夜孜孜而力行之者獨我黃公
之謂也公名廷佐字君卿世係東昌人節義馬夫
人之子為人大畧有幹局沉靜詳審外寬內明
喜怒不著於容刑賞不私於己至元二十四年歲
在丁亥之正月來守是郡以廉潔不苟為心濟人
利物為志剏構泮宮殿宇廊廡聖容賢像師位生

齋籩豆簠簋庖湏莞倉庫一無不備月之朔望躬
率寮屬詣廟瞻拜禮待師席窮經獵史命題會課
使人知孝弟忠信之義士民慕化生徒日衆文風
遂振可謂知教化之源也農業生民之本棄本趨
末者衆勸農之官例皆文具故條目諄諄訓誨栽
植者要務生成耕耘者必加功績勤惰之家各有
賞罰惰者責令後作或為科決勤者量免雜役或
賞酒饌又慮官吏下鄉擾及百姓遂置木牌代已
之行標之曰勸農牌社長轉遞傳布教令見者畏
愛之如公親到於是民皆知勸不擾而成公田無

曠閑桑菓諸樹頓增數倍鷄豚狗彘畜養孳蕃禾
稼菽麥比年饒足民皆樂業公興利之心無時少
置詢知民間日用柴薪價重榮陽南天里密縣王
寨村有古昔炭穴蹠跡廢棄既久雖土人亦莫知
其可以供爨公建議召募人衆二處鑿井起立窰
座歲餘之間厥功乃成闔郡之人民皆用焉比之
柴價省減數倍實為百世之利公議鑿井之初以
炭至汴梁陸路絕餘兩舍車運登舟販於汴城鬻
者獲利舉者有餘浚汴之舉自此始焉既而允議
於上官親董其役梗舟之樹伐去萬餘平其兩岸

深其中流二旬而畢今也船楫通行煤炭源源連
檣達汴果踐前謀民賴其利郡之境内有京水須
水梅春藥巴諸水橫於路者有八歷古及今各建
土橋有司定例春毀秋脩所需材木薪芻人力皆
賦於民復壞復修民不堪擾况一歲之中乏橋數
月涉者病焉公乘農隙運賈峪之石命工興作再
月而梁成於君民無科徵力役之繁行者免揭
淺厲深之苦兼惠四方莫善於此本境有不務本
業侵官擾民者公或懲或勸使知善道既而率皆
向化風俗變易公下車之初訪知管下屬縣每遇

差役鄉都以白帖子征歛重科復取歲時不已民甚
苦之公下令禁絕民受其賜竹課舊例其行出園
鬻於他所例有課額匠者買之制作成器又須赴
務此外復征匠家門攤大為重複及於無竹農家
徧歛農器之課此前日竹管之弊也公為釐革匠
者農者門攤悉觸免之公於獄訟用心尤精訟必
罄其詞鞫之窮盡其理既復其罪公必開陳善惡
誨令改過自新又哀輕囚與重囚同獄迺於外創
構一室俾令異處此仁者之心愛人也至於訟田
有十餘年不能決者公閱舊按視察人情皆得其

實一判而詞絕於是他郡訴寃者共訴於上司請
移公推決甚衆公明曖昧辨其曲直寃者得伸人
皆悅服遠近謂之神明黃童白叟皆曰包孝肅公
復生於世其為士者曰復覩潁川之政得非黃霸
之苗裔乎公小心翼翼勤於政事晨夕兩衙始終
之不怠嘗曰勿以善小而不為至於廩膳年例率
歛細事也公改之遇夜防囚丁壯輕役也公罷之
春夏給水療疾小惠也公為之迓府檄於隣縣微
勞也公絕之三載之中類此事者何啻百數不能
槩舉公為政深知大體不撓獄市一方鎮靜士庶

安妥以至元庚寅三月受代百姓如失怙恃皆曰
子產治鄭有君子之道四焉載之經典今公之治
鄭也利民之政甚博豈可以坐視以善名不聞於
將來鄉士賈振王璋常祐陳革輩錄其德政之實
與夫仕宦儒醫社長市戶鄉民耆老人衆求文於
予予喜曰汝等之心正合予志然而公之惠政多
矣今所錄者乃耳聞目見之事也其不能聞見者
不可得而書之又非巨手大筆莫能發揚公之美
跡辭之再三竟不獲已姑以俚語紀其實焉

至正二十七年十二月吉日鄭州管城縣儒學教

諭劉澤民撰

劉使君遺愛碑

汴梁大府也行省之治在焉當南北之衝供給百
役之所萃凡郡縣之隸是府者未易為也鄭之為
州戶賦視他州為下土疏民匱殊俗錯居為是州
者自非有威惠名能治劇尤不易也元統初朝廷
方重守令之選宣德府劉侯以

天子之命來守是邦下車之始即以興學敦化獎善
懲惡為已任事之害於民傷於政者悉去之民安
吏畏州用稱治州之屬邑四滎陽為最管城次之

汜水河陰又次之賦役輕重咸以是為差行之積
年衆志已定有私其邑而欲紛更之者民因亦交
訴於州累歲未之決公至則斷然一遵於舊常賦
之外悉罷橫歛而民用樂輸是年秋汴堤壞為步
一萬八千有奇歲常役民塞之家出一人雖寡弱
不免公曰一人從役必一人食之方盡隆冬寒貧
下將何以自給於是悉揀其丁多而實實者令家
出十人而貧寡之獲免者十八九有田鵲何鄰者
素饒財其妹之夫利其弱而有之既訟於官又誣
以毆已而致之獄公察其枉而出之并歸其財河

陰民趙孤挈家就食於汝為富家傭其叔竊賣之而孤不知也歲且滿將取直以歸主曰汝嘗自鬻為奴矣何庸之為孤逃歸而訴於公竟免於罹因圖公像而祀之民有兄弟爭財者公愀然而諭之曰財物易得骨肉至親豈可因易得之物而忘至親之義乎訟者慙而退遂親睦如初公之為政類如此至於學校教養之政農桑樹藝之法咸盡其宜橋梁衢路官府次舍無不理而新之然公之為人剛介果決議獄處事秋毫無所徇惟事理所當為則為之由是與佐席多不合而公適以毋憂去

職民甚惜之至元戊寅冬公去官三年矣鄭之士民狀其政蹟來徵文於予將刊之石以示不忘嗚呼為善而不本於誠則惠愛及人者淺而所以稱道之者亦暫焉而已劉侯之為政絕期年耳去官三年而民思慕之如一日非誠於為善而有實德在人心不能至此也向使公久於其職功業為何如哉劉侯名可任字希尹幼字寧寧弱冠事英廟為近侍擢興醫監丞次依河東憲自典用監照磨出知是州其為政寬而不縱嚴而不苛愛民而好士宜其得民如是既為序其事又為詩俾鄭人歌

之以為從政者勸其詞曰

惟茲劉侯 剛果溫明 爰自弱冠 奉晨於京

臺臣與能 出佐風紀 繼參內府 庶事成理

服忠宣勤 將顯兩弁 俾試其功 來牧鄭人

公視鄭人 爰之如子 弗縱弗殘 有張有弛

孰賦未平 孰役未均 賦無橫斂 役不及貧

黃流湯湯 為郡之害 先之勞之 遄出其濟

有奪之貨 成利其孥 匪公之惠 終焉囚奴

叫囂隨突 民用惴惴 公既蒞止 民不識吏

訟事闔闕 歲引月資 公既蒞出 䟽剔靡遺

廼勸農功 農功惟叙 墻桑隴麥 既庶而富

廼興庠序 庠序孔嚴 絃歌揖讓 化行閭閻

三年有成 號稱善治 公用期年 政教休裕

公既去矣 民實思之 思之不忘 發為歌詩

滎波之瀦 益厚其澤 溱洧之流 不已其德

序公之績 勒之貞珉 嗚呼休哉 遺愛在人

至元五年三月吉日奉議大夫河南河北等處儒

學提舉元光祖撰

同知鄭州事蒲理翰政績碑

皇元幅員極天所覆張皇百度為億萬世賴官必

其稱乃授將俾相維以不墜於無窮也郡若州倍古之大國牧惟民親視尤重繇如革命迄於今餘百年制不無或隳鄭又居河南諸道交相輸繁民力嘗以兵耗官事者不遑枚舉治化有攸繫者未慮也甚弗稱

皇家仰成意旨同知蒲理翰公以進士第來倅於鄭首謁先聖學宮視神宇像設多損問禮器服則以假用對公愀然亟歸營具撤其朽敗更之躋沂國鄒國二公於配享位遵成制也廟貌一加繪飾購銅屬邑為舍以範祭器貨帛制革以為禮服命吏

守藏以司出納制度一揆彝典易陋而新禮始備焉作郡稱若干卷因建祠自國僑以降八人祀之表曰鄉賢表唐賢相晉公裴度墓於郭南四十里之道途仍勒石紀績於其側以示尚德立堂試法比屬內之業儒者中程一十一人賞以深衣布筆人二枝經或四書部各一視考上下差給之皆以已俸偁公暇則集吏談經史律議日為常以示獎善為後學勸又以麗樵申令警衆而卑陋甚謀改作之需既具以天時禁忌承檄而止先是公建常平倉患所儲寡而慮積秣久耗失即鬻以糴粟實

之為石三百餘其餘甃以甃學宮庭便奠謁舊制
養濟院以贍無告民久浸廢弛公為葺室擇法當
恤者處之郡無迓詔命所建堂東郭風雨始有蔽
倉及院若堂皆四楹五棟倉堂覆以甃甃院藁結
鄭歲飢公虞請賑不時得勸分於富民以濟民賴
以全活者甚衆民有嫁妻而為人脅以取賄於路
者夫黨誣訴脅者以行却司捕者不察鞠成之比
械送州四斃其二公為辨其餘出之將坐人者以
恩免公去位郡人德公偕儒教諭張汝弼以狀來
請銘於石曰公績皆前政所未有為不可沒俾之

將貽久示勸為不可也吾子仕以縫掖進銘之為
宜而不可辭以寡陋弗獲因拱而進曰君子學道
則愛人小人學道則易使昔者言偃行所聞乎夫
子者於亂世絃歌興焉

聖天子以文教善俗以善政養民之數事者以迓而
少之豈

朝廷初志所期哉矧處之劇地務皆以身任又獨兼
人所不及可謂稱所畀寄者矣若夫公之爵里行
述與廟之禮服噐數則具乎待制徵君公炳之誌
茲第節其大凡而銘之曰

王制有具 道一貫之 道惟其行 具其可隳
孰廢厥具 王道攸寓 後蔑所因 動將奚據
公實起之 又振起之 邈哉公心 其尚體之
至正二年歲次壬午秋七月吉日奉直大夫尚舍
寺經歷洛邑任棫撰

郡守伯牙公去思之碑

理民之官政寬則民慢猛則民殘昔固有是論矣
必寬猛適中惠德及民而思之此則所謂豈弟之
君子也自秦治郡縣漢興以來允守若令之哲與
愚載之史簡如黃霸之由潁川入為宰相卓茂之

自密令超拜三公雖皆上之人有以作興而敷獎
之然亦諸君行能之有素也今鄭之為郡通陝洛
接梁楚乃要衝之一都會也任是州者豈不艱矣
至正四年鄭州長伯牙公以是歲七月蒞郡事下
車有頃令行禁止故允救飢恤民興廢補弊之政
纖悉畢具鄭人賴之如慈父母焉至正七年當代
去老稚遮首不忍別所以至今思之欲瞻其顏采
如景星鳳凰莫可得而見也欲沐其膏澤如慶雲
甘露又烏可得而數霑濡哉名亭顏忽都字元卿
伯牙其氏甫弱冠即擢巍科至正八年以治行高

第八翰林叅贊經筵而緝熙聖學啓沃君心將有日矣予又考之春秋子產治鄭二十六年而終丁壯號哭老人兒啼若伯牙之治鄭不逮子產而人亦思之其德澤深矣公方赫赫於世功業固不止於是耳姑書此以慰鄭人之思焉又從而歌曰
田彼南山兮春陽既晞 純素在軸兮日匪停機
男有餘粟兮女有餘衣 衣食交足兮我公勉之
公今高舉兮我民安歸 思之曷已兮與雲俱飛
至正九年三月吉日鄭州文林郎浙江等處儒學
提舉劉幾撰

知鄭州劉公德政之碑

大元以武功定四海文德安萬民立法定制規模
漢唐損益百代綱紀內外體統相承無敢踰越至
於育養民物庶富而教尤所加意故褒用廉俊遏
絕貪墨內立臺府以持憲綱外布監司以振風紀
黜陟進退善惡著白所以示好惡於天下者皎如
日星故風俗一變郡邑守宰體認

上意罔不知修已治人之道大德二年春知州劉君
來蒞於鄭下車咨訪耆宿搜剔民瘼具知積弊源
委於是自致表率之地以冰蘖絕吏貪以威察塞

律噐以勤強起滯廢以公平服豪橫已而墨者革
寃者雪廢墜者起逋負者復炳炳然成就繩墨先
時勸耕無法不出以時訓不知務名為勸之其實
擾之也公以豐約係勤惰自非水旱天孽莫非民
力所致於是一課督嚴勵導誘有方民儆而勸鈞致
逃隱避賦者幾百家悉令著籍與民均役屬邑姑
息胥徒里長俱得免役至於歇替猶蹈前軌或至
倚公年奪公具得姓字發摘具服或罰或追役服
於民財沒於官姦情盡革豪商富賈營貸收息一
本之利滋累十倍民雖破屋鬻子猶不絕償公因

訟據法本息相當追裂其券餘息徵沒鄭為宗王
食邑王素稔公廉勞於撫字民獲安逸屢蒙慰賞
河南郡邑南接荆楊游民掠誘假以過房軀賣公
勘審覈實歸族還民者無慮千百學廟弛廢前代
視為緩務公以學校禮義之地為政所當先也乃
脩飾講舍敦請善進學徒躬率講肄學者向風焉
行有符下本州開濬京索河以通舟運言謂河水
為水礮壅滯可令礮家各置石埧以積水力以公
提督上意甚銳公計礮五十余所甃石工木之費
民雖蕩業碎產功不可成乃宛轉開陳卒見釋從

公於惠民利物有如嗜欲講究搜訪不忘寢食必見成效而後已古所謂惠人者公為近之至於積歲深訟疑獄屢經天府所疑不絕者彼照勘審別無隱情皆人意見所不到莫不窮竟底衷咸得允協故獄無淹滯境絕冤抑葺理公廨筮廳吏舍門廡囹圄或創或因期於修整堅完使後人無所增置而已村甍食物所需規畫巧便事成功就人不
知勞又建三皇廟以勸世設醫學舍屋官地以惠貧僦事雖纖悉經紀莫不有法四境晏然無吠犬之警四野熙熙安生樂業者老談譽以為數十年

來為州治者莫可比擬屬縣畏威懷德成就脩飾風憲巡察不發卷牘而去連歲飛章治聲達於省臺可謂名實無愧矣秩滿代及遠近悵惜思所以慰其望於久遠者德偕來以碑文見請余嘗論民無恒俗由政而變潁川一也廣漢治之則告奸成風黃霸治之則揖讓成俗民之從化捷於影響可不慎歟鄭之臨政者不知其幾人所謂居而人之化去而思之能無一人之可道耶劉君之來亦三載耳民頌之洋溢薦舉之紛沓何其多也古人有言以千金與人而不感以一言及人而不忘者誠

與不誠也劉君之政非有絕遠難行之術也今之
好名慕進者皆能也然民之戴仰親愛去而不忘
莫若劉君之盛者動民以誠故也詩曰豈弟君子
民之父母其此之謂與嗚呼使臨民者皆如劉君
敬上者皆如鄭民則風俗何憂不美治平何憂不
成哉君諱求祚字天祐世為磁之滄陽人既為之
記復因民頌而為之贊曰

魯饑食郊 角盡甘口 魏碩畏人 潛開兩牖
壯哉虎冠 民避而走 漢脩悃悃 國靖民休
占風邈然 求媿承流 彼美劉君 其跡可儔

興利濟物 如饑未飽 搜出貪蠹 如疾未瘳
直道是陳 抗志無撓 建學求師 躬率身導
務本力農 游惰靡容 勸課無怠 春雨秋風
恩融孤寡 威懾頑兇 市絕警擊 野有擊壤
他獄來斷 鄰飢就養 庭無滯訟 囹無留枉
風紀積羨 連歲飛章 潁川南陽 古稱召黃
以彼比此 孰有孰亡 今君去矣 民慕曷已
明效顯績 彰彰可紀 願刻貞珉 以求戒羨
大德六年歲次壬寅七月既望承事郎懷孟路河
內縣尹兼管本縣諸軍奧魯勸農事劉光祖撰

文武忠孝之碑

至正二十二年二月丙申中書奉河南行省平章
臣察罕帖木兒言昨奉

皇太子令旨

賜臣文武忠孝四字擬摹勒於碑伏乞

聖慈詔詞臣撰文贊美不勝幸甚詔可迺

命臣竊為文叅知政事臣素書之翰林學士承旨兼

太子右諭德臣好篆額臣惟平章察罕帖木兒先

世蒙古乃蠻台氏國初從王師於河南山東等處

與民相參長田其後遷隸山東都萬戶府遂寓沈

丘因家焉公嘗與進士與鄉薦值河南倣擾所在

郡縣多失守碩族間當賊衝弗衛恐發乃糾同義

敗散募兵得數千人將以攻羅山汝寧築城拔之

朝廷授命監汝寧府尋復陳州俄陷溫縣焚武德鎮

公擊賊於津大破之陞戶部侍郎既定陝州陞刑

部尚書未幾賊入陝西陝西州以急告即

命公領兵趨潼關奪其隘擊賊走改僉行樞密院事

賊據華州南山猶負險柵守公悉破之欲蜀武靖

隴西秦鳳諸州陝西行省左丞已而賊由絳間道

入河東

詔公河南河北等處便宜行事出師討之所向輒克
盡復晉冀所失陞平章政事同知行樞密事兼陝
西諸道行臺侍御史時汴梁為賊據偕年竊號與
浙江勢聲相平借公大選兵自陝直擣破其城首
賊已宵遁獲其偽官屬及賊首毋妻以下五千餘
人兇徒盡殘遺民安堵如故來

獻狀

上大悅加公銀青榮祿大夫河南行省

平章事同知河南山東等處行樞密事并授其父
阿都溫大司徒兼陝西等處行中書省平章政事
於乎公之是舉可謂盛矣寔惟我

皇上之明而善任使推心將師不從中制故得以肅
將天威展其才力而致此敵愾之功焉於足儲

皇灑瀚大書四字環文瑞畫神采飛動若浮雲之郁
紛垂露之凝潤禮出異常前所未有刻琬琰以揚
盛德之光俾人之所羨有不興起於風厲哉臣請
得而詳言之臣聞文武無二道因事之殊而用有
不同焉爾其在

朝廷禮樂典章以之經遠而脩明王度者文章也有
四方之警出師討罪以戡亂而先機識其達於戎
首者武事也故干羽俎豆之間而甲冑折衝寓焉

若夫忠孝本諸人心為臣子者明於事君之義則
事不避難而無不致其身矣知所事親之道則思
立其身而無不竭其力矣故忠者孝之移忠之盡
則孝之至也古之君子為賢公卿為良將帥功在
王室名昭後世靡不由之儲皇特書以賜公其訓
弘其旨遠矣今公既刻石顧瞻則所以畜報
聖天子之至恩降寄碑書業克臻於成詎不偉然而
記之哉翦既序之又系之以詩曰

歲在單閼 有道難發 于穎弄兵 城墜邑殘

蝟興蟻集 蜂起魚潰 小惡弗剪 積成大熟

時察罕公 起昌義師 叔銳翕隨 斬旌塞旗

以從大師 摧鋒勇發 汝亮陳師 攻無不拔

繼援關防 復定秦隴 再帖并晉 風聲雷動

乃課農田 廩倉既實 乃操士卒 行陳既一

徂征汴梁 蠢彼狡狂 引其羊允 嘯呼跣踉

大軍薄之 升陴陘隍 賤血猶焚 我疾焱火

浮者馘首 其解若瓦 陟之崇階 公拜稽首

皇帝曰咨 汝功勩哉 陟之崇階 公拜稽首

匪頌烏變

皇帝聖明 大福如天 亂茲底平 固豈臣能

臣受令旨 儲皇嘉上 大書以賜 文武俾才
忠孝伊德 才以德稱 一肅初終 經營告成
尚輯德功 儒臣贊詞 毋替厥聞 俾是刻章
四方其訓

國朝

鄭州脩城池碑記

自古聖人者出教民築土為城掘地為池而居於
其中然後鳥獸盜賊之害息此城池所由始也鄭
舊管叔城唐武德間改為州圍九里三十餘步門
有四東曰寅賓南曰阜民西曰西成北曰拱辰池
有而匪浚歷宋元來湮於歲久玩於世平官憚其
勞而不肯為民迂其事而不樂為迄無成功我
朝州守林公厚王公彥常洪公寬雖常相繼從事亦
非高深經遠之謀正德庚午蕭公名淵字文靜以

錢福榜進士歷行人御史僉事副使不附逆瑾請
守於鄭以城池民賴保障一勞而永佚固專城者
之急務也孔子曰君子信而後勞其民未信則以
為厲已也姑緩之由是興利補弊除奸禁暴節用
而愛人惟知惠以養民不知勞在我也惟知恭以
事上不知貴在我也不一載而政通人和吏畏民
懷公曰民可使矣乃謀諸察案袁公宗洎鄉宦耆
德僉曰宜遂慎選能幹公廉者二十七人分董其
事袁公則總督經營揆度布置規畫實蕭公精神
心思之所發也爰始於正德辛未夏五月落成於

秋九月城高三丈厚如之廣二丈五尺深如之城
上鼓樓四角樓四雉頭六十九輪奐巍峩盛於昔
也城外吊橋四甕圈四壕塹環帶渾噩天限創於
今也前無與俦後無與匹猗歟盛哉既而盜起山
東迤蔓河南所過州縣無不殘滅壬申春三月朔
流賊數萬騎卒至城下四面攻圍勢張可畏公無
惧色選寮屬儒官有膽畧者各率其衆以禦四方
攻守無不策應一時呼聲震地精誠貫日東城壯
士有劉姓者誤中飛矢衆莫敢動其號令嚴明有
古人風賊欲登城高不可久有木石以頽壓之欲

越池深不可入有砲矢以阻抑之相待一晝夜計無所施知其不可犯而去城保無虞萬姓全活公何以得此耶以素服之民保有備之城池然耳孟軻云天時不如地利地利不如人和是徵矣捷聞提督彭公督儲黃公巡撫鄧公巡按李公各以銀牌綵段獎勞及交章論薦隨有山西叅議之擢旌賢能也鄉耆屬予曰公行矣脩城保民事不可無記予惟使民不能以無勞勞之而不怨者為貴城池不可以不脩脩之而足以保障乎民者為貴乃若鑿斯池也築斯城也民弗與守而去如今之裕

州諸郡則亦何益之有哉公之惠民殆不止此他如蠲坐月之夫省里甲之費雪古氏之寃除侯圻之患使命無科擾之虞過吏無需索之應以至州治府館分司壇壝舖舍倉獄之類無不煥然維新公力優為也嘗語人曰鄭城舟形也當引西流水環遶則人才達民利通矣惜公去而民未就也因併記之以俟同志君子云

正德七年歲次壬申冬十月吉旦知縣郡人傅民

極撰

報政樓碑記

古人宦遊之地凡建立樓臺亭亭咸因事命名以寓諸懷太守童公報政樓成衆皆難其名請予解之公泚之蘭谿人由進士初任監察御史振揚風紀凜凜風裁不可回撓朝著咸推重之以不合權奸左遷平陽推官治獄有聲當道累章薦舉於朝尋

簡命守鄭州公以通敏之才清白之操該博之學施之政事故多著竒績且立身行已無不在道理中可以頡頏古循吏鄭自近年以來兵荒相仍民事日凋流徙瘡痍殆有不堪為者公下車慨然有康

濟斯民之意除奸革弊賑貧恤孤豪右繩之以法善良撫之以恩勸課農桑招撫流移凡可以利民者無不興凡可以害民者無不除且才足以優為乃不動聲色從容籌理動中肯綮而畧無阻窒紛擾境內熙熙殆不知誰之為也復為民一鄉立為一約一約設立一長立為規式使之分別善惡各相親睦而民俗一頓革民有訟者則判署其詞付之刻期而致數言之下曲直遂分民咸神之蓋公所持者公明與廉公則無曲法明則無隱情而廉則多嚴重以此折獄宜其神而速也至於征歛力後

取諸民所不能免者公亦有常經而民可守奸狡者亦不得有所增損於其間每事皆程度無不可師法者積粟至三千餘斛以備荒歉尤留心於學校緝治齋堂祠宇暇則課諸生講學所造就甚多仍以餘力於州城四圍增櫓樓七十餘座皆翼然可觀又導城西之水濬渠自城北入東郊灌田若干頃民咸利之仍於州治大門外兩傍隙地左建申明亭右建旌善亭各三間申飭榜例於其中二亭之北左建州前總舖右建惠民藥局二間題署一新又於大門內儀門之南兩傍各翼厦廊各三十五間此百餘年廢政一旦就舉而改觀其經理區畫又皆獨運於心費省而事集皆無所取辦於下民益樂之甫一年四境無虞百事俱舉而政以成顧大門頽圯不堪閑衛悉毀其舊址為磚臺一座高一丈五尺長如之闊視長四倍而圭洞其中以通出入方集材為樓於其上以置鍾樓警晨昏適癸酉冬當入

覲之期公束裝北上報政天官部復考最越三月方回乃正德九年二月也公回而樓適成因名為報政樓云且規模宏壯高聳軒豁太守於暇時登臨

其上極目遠觀四野無際則見斯民之耕者於郊
漁者於水樵者於山商者於市往來絡繹各安其
業此斯民之樂各得其所也太守與郡士大夫
酌飲賡唱於其間開豁襟懷一洗塵慮而盡之此
又太守之自得其樂也太守自得其樂而樂斯民
之樂斯民各得其樂而不知太守之樂其樂也
居無何公遷二蘇郡茲當行民之思其樂者將指
此樓而詠之比之甘棠之愛也太守諱寬字栗卿
號梅山云

正德九年歲次甲戌夏四月吉日

賜進士奉政大夫陝西按察司僉事蔡堯卿撰
鄭州重脩城池記

今鄭州即古管叔封國也地無險阻路當要衝世
治四方輻輳世亂四面受敵城池視他州縣所關
尤重且急疇昔舊有城率積壤為丘易崩易敗亦
有池水沒沙塞可通徒涉三之二名雖有寔與無
等耳兼近年流賊殘破風雨凋零地瘠而民貧役
繁而賦重歲不熟事多艱為州守者若非弘毅精
敏若非變通練達若非節儉廉介若非文武謀畧
欲望興廢舉墜建功立業顧不難與正德戊寅夏

六月晉臨縣劉公欽承

上命來守是州下車後慨然有志脩舉時值淫雨彌旬百務俱廢雖欲不為脩舉勢自有不容已矣公迺協寅僚萃士庶胥與謀曰民非城池其何以安至毀櫓中是誰過與僉曰然顧才力有未足耳公曰吾財不科諸衆取諸刑人之贖金者吾力不病諸農分諸庶人之在官者如之何如之何僉曰善公乃刻期興工因時制宜卑則崇之狹則廣之缺則全之虛則寔之崎嶇則削平之四正為門外有郭傍有亭上有樓東曰寅賓西曰西成南曰阜民

北曰拱辰周圍九里十三步八方為舖始震曰解凍終艮曰澤堅計七十有二所女墻高下長短彼此如一計一千六百有奇池則因舊溝為限惟疏惟濬既廣且深其他凡廢墜有關於城池者無一不加修舉凡城池內外遠近有關於守之當為者如學校如壇社如隄防如橋梁如道路如館郵如兵械抑無不次第撤而新之時未半載功已告成民罔過勞政無遺廢方地環千里不驚盜賊商行旅止不擇處所治民事神修文演武可謂備至耳矣然則公之才力守為不於斯而俱可見哉鄭民

感德成頤刻石

文廟以彰厥美復繫之以詩曰惟茲鄭州水泛土浮
有城靡盬有池斷流迹年寇侮孔棘孔憂我公戾
止銳意興修天降厥災霪雨大來一時百務俱廢
成頤公曰噫嘻寧丁此時職居典守厥責何辭儲
才均力因事制宜廼築廼鑿曾不逾期惟高有城
惟深有池翼翼堂堂濟濟湯湯民安其枕盜遠其
方功覆斯所民自難忘載文刻石永媿甘棠

正德十三年歲次戊寅十二月吉旦

賜進士第中憲大夫知湖廣永州府事前福建道監

察御史致政郡人曹來旬撰

鄭州修學記

余奉使至鄭詣其學宮進拜禮殿退坐講堂與其
官寮師生踟躕周覽至於終朝見其室稍老矣其
地鹵故其墻壁下潤勢有將壓者泮池階級之甃
有缺而未補者其州守余君憫然若以為已任而
未言也明日造余言曰靖之至此州也始踰年以
民政之殷也朝勉夕惕未之有暇而於修學固不
敢以為緩其材甃之需程役之督已訂於二屬或
有定論將揆日以畚之矣幸君子之至於斯也請

記予嘉余君之知所務也為之記曰為治者之於
人才必聚而教之又追崇古之聖賢可以為其師
者使祀之蓋以為不聚則散而獨學必至於怠荒
無所祀則希仰之心弛焉此士之情也昔伊尹獨
耕於畝畝而誦詩讀書以樂其道顏淵獨居於陋
巷而不違仁未嘗與其輩衆處有莘東魯之泮宮
也然人不能生而皆伊顏欲使其學為伊顏則當
庠序以聚之矣舜常若見堯於羨墻孔子時復見
周公於夢寐其希仰之篤不待塑像版位以警心
目也士之慕聖賢豈皆若舜孔哉欲使其學舜孔

之篤於希仰則當廟廡以祀其所師者矣人才之
成所以未有舍聖賢廟廡之祀廢師生庠序之聚
而能有成者也乃若鄭之為地自古及今人才所
出而所以成之可不盡其道乎何也周之東遷依
乎鄭非鄭則王跡愈替矣晉之主夏盟也汲汲於
得鄭非鄭則霸畜弗振矣潁考叔之事母可為孝
子產之事君可謂忠夫王霸上所幹之大運也忠
孝下所守之大閑也鄭之前哲有與存焉洎於後
世史不乏書而至我

皇朝有都憲著節者有幹苑發聞者有魁名顯仕者

其他內外厥歷未易悉數謂鄭有人才不其然乎
今余君思所以盡其成之之道而脩學是務將見
英傑繼起而民以之化俗以之羨收功效於當時
垂聲光於後世可必矣豈不善哉乃遂記之使落
成而刻焉

天順三年歲在己卯孟夏吉日

賜進士及第奉議大夫通政司右叅議兼翰林院侍
講求新劉定之撰

鄭州學歷科題名記

事固有若甚迂可緩而實切於化首繫於區勸之

大者得其人則舉非其人則缺故為政必知其所
先務而後治勸蔚然可觀新安洪侯寬治鄭州六
年矣其始也諸務未遑而獨先葺子產廟以漸葺
鄭州學及孔子廟企德敷教二堂及困館於學刻
大學要畧諸書以便教與學者既又礮石於學題
科目之士之名以風鄭人而提學按察副使臨海
陳公選謂不可無記於是洪抵書京師以屬於走
洪侯之為政亦可謂知所先務者哉夫學校治化
之首科目之士學校之所自出者也凡今小大之
臣彙列中外以仰輔 累聖而建成隆古熙洽之

治者率皆重科目以進則題其名以示勸固典之
不可缺者與鄭河南巨州也南北要衝轄四縣提
封數百里風土長厚魁人多士 出乎其間

國朝更化以來科不乏才若翰林編脩邢公恭都御
史王公彰其最顯者顧其流風餘烈後生小子漸
以無聞蓋斯名一題而後教者慕前人之高足學
者撫先達之遺芳然有所興起而不敢懈以肆其
功於化首而繫於世勸之大者何如哉昔子產相
鄭不毀鄉校有遺愛孔子稱之洪侯之為政蓋於
是乎知所先務矣彼所謂能吏者汲汲於簿書期

會之間其不以是舉為甚迂可緩者鮮矣洪侯以
禮經舉於鄉筮仕知桂揚州適峒獠作亂之後招
來振恤有聲湖南踰二載以憂去服闋改鄭州其
善政尤多而其大者則省運邊筭及剏藩府開漕
河顧役之費以千萬計催科救荒緩急得宜部使
者下其法於諸郡縣諸郡縣有訟多請於上司就
決於侯一州晏然相安於無事境內牛馬率多雙
產而坊民有育蚕開簇環結成衣宛若天造者巡
撫都御史江浦張公瑄暨巡按御史再相與薦諸
朝被旌異之典而將來政之所底未艾也走與侯

同郡人喜侯之政有序也故記其題名之石而并著其治勩使觀者有以見學校之本政源化如此云

成化十有二年丙申冬有二月日南至賜進士及第翰林侍講承直郎同脩

國史兼經筵官新安程敏政記

鄭州學歷年貢士題名記

國朝紀元成化之八年歲在壬辰新安洪君寬政知河南之鄭州厲已以脩職懋志以興事悉取州廢墜之典而舉之學宮傾圮施教弗稱遂以為首務

思一新之於是鳩工度材謹飭百廢規制煥然後弗及民而明倫有堂肄業有齋門墻嶮嶮足以聳游觀館舍邃嚴足以樂藏息小大成稱無所苟焉且以學校養士之地歲常舉其賢能貢於

王朝者衆矣是不可以無紀爰伐巨石題其氏名以示後之人將使州人士有所勸焉夫興學造士賢守令之所為重者君克舉之亦賢矣哉間走書幣京師干余記其事因告之曰人材之成由乎教道明教道之明由乎學校脩蓋學校不脩則無以為成材之地以教之無從施也昔周盛時學校之政

徧天下然其所以為教初非寄之言語文字間者
故以鄉三物教萬民惟曰攷其德行察其道藝何
如耳今之有司以歲貢其學校成材之士於
朝即所謂鄉大夫群吏獻賢能於王之意也今之
試之而使之卒業大學布列庶位即所謂論定而
官之意也蓋可以想見古昔養士之制者惟於
是乎存焉而豈直以進士科為重如後世之所云者
乎矧鄭為河南名郡汴宋文物之故區而漸被
國家文明之化益深以久故士之膺其鄉大夫之貢
而出者內焉百執事外焉群有司往往以賢能名

初不在諸進士之下亦可謂得其人矣然賴以考
見其所本者寔繫斯石焉繼自今為師為弟子者
樂有賢太守聿新茲學雍雍濟濟日聚處於斯考
德飭行誦讀詩書以講求其所謂得於心而為德
則天理民彝之則在焉體於身而為行則孝友忠
信之懿存焉見於事而為藝則詩書禮樂之道具
焉於此是悉心盡瘁以脩以習以求至乎其極以務
成乎賢能之材至於其暇又因其所題諸士之名
耿耿不可泯如此將舉其賢否之實而申其議擬
之公蓋後先相視同軌一轍耳顧其心有不惕然

其動者乎其志有不奮然以勉者乎夫然故他日
繼是以出者推其所浔於學校之教而見之為政
其名有不燁然以傳者乎奚啻增重斯石而已也
則賢太守作與之素心示勸之嘉典蓋兩得之而
茲學得人之盛當不一再書而止也越六年丁酉

夏六月望

賜進士出身翰林院侍讀經筵講官兼脩

國史錢塘倪岳撰

鄭州學義田記

余方有知時侍先嚴於宦邸目擊桑門葦荆梵宇
莊嚴佛事甚驚駭稟諸先嚴曰營是奚為先嚴言
以報若本余復請曰吾儒獨無本未聞報之有若
是者先嚴愕然曰待汝倡也余既冠曳藍皂於州
庠故紙鑽五六祀惟一義字認頗真凡事為無涉
於是者不敢須臾處迨接壬午鳳翅筮仕令蘇之
常熟因懷向之失學寡傳授乃罄俸餘訪儒碩走
幣四方求五經四書義各一部共若干篇發鄭庠
中復鑄銅爵二十硃紅篚廂九供孔廟中祭儀及

掛冠歸思效前釋之報本慮身後如或墜非久常
計越明年買鄭乾隅附郭良田一百八十二畝送
諸學為義田計收穫歲供吾夫子誕辰儀并脩葺
事餘則科貢婚喪各量周之稟諸州守郭侯欣然
曰盛舉也許蓋義倉三楹於育德倉之兌方二斗
級以伺守歲輸一生提督收歛仍慮日遠豪右設
法兼并乃悉其地之至界蘇畝以付鈇筆庶克慎
終始如一日非納交於鄉黨朋友也將以招繼是
而興者以大其事也若有侵匿弗入公廩者非端
士吾夫子在天之靈昭報不爽今將地之疆至支

用則數具後煩吾同門友共世守之希勿替

弘治五年歲在壬子冬十一月壬午科舉人前令

常熟縣郡人黃慶誌

重建鄭大夫廟記

鄭大夫廟在州治之東毓賢街鄭人祀子產而作

也先王之典有功於國則祀之有功於民則祀之

子產之相鄭也其交鄰有禮歷數世無大國之侵

鄭寔賴之其治民以義暮年而化行豎子不戲狎

班白不提挈市不豫賈戶不夜閉道不拾遺其歿

也壯者號老者啼曰將安歸功在國德在人心惟

深且大故民之思之至於今不能忘欲報之而不可得廟以祀之亦惟攄其愛慕之誠焉耳漢之循吏若卓茂之於密魯恭之於中牟朱邑之於桐鄉皆得祀其土子產功德在鄭豈直一邑皆廟不於鄭而誰祀哉廟始建勝國時其地則宋神霄宮故址也州人事之甚謹歲時必祭出入必告灾患必禱禱且輒應歲久廟就圯

國朝洪武中守臣常繕脩之而故制卑隘不足以揭虔安靈顧未有能大之者成化壬辰洪侯寬來守是州亟圖改作而未遑亦姑葺之五越寒暑境中

風雨時五谷熟疫厲不作民咸曰子產福我哉侯仍捐俸餘合州之大家撤而新之再閱月而落成州人瞻拜廟下踴躍鼓舞相與礮石來告曰願有紀也於是侯寓書京師徵予記於乎君子之為政莫難於得民得其民者得其心也得其心則生而父母之歿而俎豆之不惟當時思之後世思之至其子孫孫子百世思之有既乎詩曰有斐君子終不可諼兮今去子產二千餘年而鄭人思之愈久而不忘其得民之深何如也夫豈可以聲音笑貌為哉蓋人心之公所以善善而惡惡者萬古如一

日孔子所謂斯民也三代之所以直道而行者觀於斯益信是舉也順人心崇賢德又將致禱以拯災禦患者為民之心尤拳拳也噫洪侯其賢矣哉始事於丁酉歲二月辛未積日七十有一而訖工廟宇為間者其崇三尋有六尺其脩若廟加舊視什之二而壯麗倍焉民獻其力工薦其技是宜舉之易而成之亟也備書以告來者嗣而葺之庶斯後之不墜也侯歎人練達閭敷領鄉薦筮仕桂陽有聲未幾以憂去及改鄭而譽益著嘗省邊芻及浚河顧後之費以萬計脩曹魯河京水河隄他郡

皆被災而鄭獨無患其善政多類此頃以巡撫大臣薦蒙 旌異之典云

賜進士及第奉訓大夫司經局洗馬同脩

國史兼 經筵官仁和鄭環撰

代祀周世宗碑陰記

今

皇帝既復寶位改元天順政化更新乃二月己未

御奉天殿傳制遣文武侍從之臣禱祀嶽鎮海瀆先代帝王臣定之當往河南祀有四道先至鄭州祀於周世宗皇帝之陵前期率其守土群臣致齊以

所賚內庫寶楮若干緡貨置犧牲醴齊樂盛庶品
三月下弦穀旦乙酉遂奉

御前所頒祀辭香帛行禮既畢將礮石勒祝辭具如
故事臣竊惟

國家於先代帝王三年有常祭而初元又有殷祭者
固以承其歷教統緒之故亦以其嘗有功德於斯
世民之不能忘也因其民不能忘而致隆之又足
以示君道於無窮而使來者則焉豈非一舉而數
善存也哉有若世宗當干戈叔運嗣位始年誅叛
將却強敵平淮楚諸郡而李主者北向稱臣置雄

霸二州而契丹不敢南下牧馬其武功足以揆亂
矣至於脩通禮定正樂考曆法議刑統與夫均田
制而兼并抑毀梵像而正教崇其文德亦足以致
治豈五代之君所可及哉是以

聖朝躋其祀典使得接武於漢祖唐宗之後未為過
也然則世宗雖享年不永於其躬垂統遂絕於其
胤而寢陵常存廟食弗絕亦可以無恨矣豈非賴
我

皇明而然哉冥漠有知陟降

帝廷其能請

命以祐助無疆大歷服於億萬載云臣恭承
朝命敢述其說於碑陰其陪禮群臣具列職名如左
以告來者

天順元年歲次丁丑春三月吉旦

賜進士及第奉議大夫通政司左叅議兼翰林院侍
講求新劉定之撰

裴晉公墓疑正統丙辰余至鄭州閱書有裴晉公
墓疑焉訓導郭明郁以唐書晉公傳載葬公管城
為証余亦以為然今自新鄭過鄭州見道傍有碑
刻云裴晉公神道碑郵長指墓示余余為已過其

地矣未得一視雖稱有祠有碑今已圯壞而余疑
終未釋也誌書舊祠為王欽若所建欽若輕信之
人豈可信也按晉公河中人為元和賢相自平淮
西名震天下出領外鎮穆宗長慶間起為河北行
營招討既而為逢吉黨所擠落平章事以僕射鎮
山南敬宗覽其章奏而復焉開成中留守東都加
中書令文宗召至京病未及見賜詩有曰注想待
元老識君若不早我家梁棟衰憂來學丘禱而公
竟歿管城即鄭州距長安遠矣迺葬於此豈其子
孫有留管城者因以葬之歟此方少書籍無所証

處多有傳而訛者裴為唐顯姓意有嘗為遠官歿而葬鄭州者後人訛以為晉公耶至洛陽取郡誌閱之宋相魏仁輔子駙馬都尉魏 葬於彼則訛以為魏徵墓唐太子弘追謚孝敬皇帝葬於彼則以為敬宗陵余竊以謂魏徵陪葬昭陵敬宗崩於長安其陵墓豈應在洛耶為考其墓碑徵諸史冊而正焉或者此亦其類耶若唐書載晉公葬管城者蓋書宋景文知鄭州時所脩當因鄭州人所傳而書之未及考尔况韓文公河陽人其地為河北今集中可考明甚唐書輒稱為南陽鄧州人若此

可盡信乎旅寓中無載籍可考但書予所記於誌書之末以俟知者余既書所疑唐裴晉公葬鄭州始末於誌書因記一事余家吉州州人皆言姚元崇牛僧孺劉沆俱未新人至日其地為三卿相後孺又為文而傳余自疑之後讀唐文粹見牛僧孺家世及至陝右觀元崇父墓碑其先為吳興人徙陝然後信傳者之妄而有釋余之疑也劉沆固未新人二公豈嘗至其地而後人並稱之耶裴公所葬他書及別處當可証姑俟之余友監察御史彭百鍊求樂為余言見晉公之孫而嘆其家之微弱

彼時未及詢於何處見焉正統己巳仲冬長至後五日太和歐陽哲書於鄭州河南道公廨蓋自泝江重臨河南也

裴晉公墓辨

裴晉公度墓在今鄭州南三十里林錦店墓東有公廟宋王欽若建廟碑云在廟西三百九十步今墓及翁仲羊虎猶在以方位步數攷之皆與碑合傳地志無異說歷代詩文可証者尤多余以使事至鄭州問諸鄭人朗然河南憲副歐陽廣哲博洽君子獨文以疑之云欽若之言不足信又云公歿

長安長安去鄭遠不應葬此余攷本傳公讞政居洛集賢里綠野堂每大臣自洛來文宗必問度安否其後召不赴賜以詩使者及門而公歿然則歿於洛非長安也自洛之鄭三宿可至何遠而不葬乎縱歿於長安亦豈有憚遠而不歸遂旅殯乎歸葬雖貧賤者能之而况公將相大家乎愚不肖者且願之况公之賢不以首丘遺命其子乎欽若雖非賢豈至於無一言之可信乎借曰欽若不足信然宋景文公嘗知鄭其作唐書載公葬管城管城即鄭也景文書其所目擊亦不足信乎其不待

辨而明但歐陽既疑之而鄭之新誌遂削公墓是時翰林據以脩寰宇通誌亦無由載倘後人因之樵牧不禁耕懇無忌則害前賢損風化多矣余故辨之以救其失且以補通誌之缺云

賜進士及第奉議大夫通政司左叅議兼翰林院侍講求新剴定之撰

重修廣濟橋記

奉寧四閩古皆有橋廣濟其北也歷歲既久傾圮滋甚民之病涉者衆矧踞當南北之衝諸郡貢賦輸於

京師者皆由是行橋尤不可廢也宣德丁未冬予承乏是郡乃架木為徒杠雖免褰裳涉水而重載之車猶亂流而渡恒思經營石橋以為永久計以民事方殷未克如志壬子春有僧慧廣杖錫自滑而來慨然請任其事予深喜其知吾志也遂許之慧廣乃躬荷鍤操畚與傭工伍既濬其流爰築其防或披衲持鉢施粟麥於市廛或五體接地丐布帛於富室石取於他山甃運於陶冶勞心焦思雖祁寒暑雨汲汲不少休予復憫之間亦助其貲糧工役凡三閱寒暑而橋始成規模壯麗堅緻經久

望之若長虹飲澗俯之若青龍臥波於向之徒
涉者既無厲揭之患而轉輸餽餉者亦安然馳驅
若履坦途矣噫濟人之功正吾儒者之任彼大雉
氏之徒但知求福利益而已乃能殫竭心力以成
吾濟人之志如此是可嘉矣夫郡之父老相率請
文以紀其歲月且係之以銘曰

奉寧之邦 南北周行 鄭河之水 其流泱泱
橋曰廣濟 寔居坤方 歲月之久 湍激齧滌
善崩其岸 復圯其防 否極而泰 廢興理常
累甃代柱 甃石為梁 弗庸造舟 撤彼徒杠

車與任載 若履康莊 民無病涉 予心迺康
相厥成功 緇流之良 勒銘滄間 永示勿忘
宣德乙卯歲次孟夏吉日奉訓大夫鄭州知州潮
郡林厚撰

鄭州重脩和義橋記

鄭州誌云京水出州西南流經州西關外東北流
入圃田河以故西關外有橋跨於水上其名曰和
義然而已毀矣州太守余君靖謀為經久計捐已
俸以倡之寮案繼而和之州之義士富室相與群
趨之余君以州之崇聖寺僧慧廣為無私也使歛

其所得財粟鳩工伐石以脩之以天順二年二月
橋成於是自此而西者近則河洛峭函遠至於秦
蜀自此而東者近則滎澤汴衛遠至於京畿公私
往還絡繹駢填車轂擊無曳輪濡尾之患人肩摩
無深厲淺揭之失莫不以為便而歸感於余君焉
余奉

命代祀至鄭見境內罕有石橋蓋其地無長河大川
不通舟楫遠方他山難致而所以為橋者不過小
材覆以薪芻填以土而已其易毀固宜故雖以子
產之賢專鄭國之政溱洧之東橋猶未及脩乃以

乘輿濟人抑其時方牽於征役會盟之多故馳玉
帛飾車從以從境外之役而晉楚煩言之責交至
於國中故其勢有所不遑及以致民病涉而貽譏
於孟子良有由也今余君幸當

聖朝御宇民安物阜之際而此橋之成獨能以石可
以久完而難毀豈非鑑子產之缺而服孟子之教
故然歟余君建寧人由國監出守山東武定州以
遷於鄭所至有績其為人詳慎和雅有足稱者余
故因其請而記之昔

天順二年歲次戊寅季冬吉日

賜進士及第奉議大夫通政司左叅議兼翰林院侍
講求新劉定之撰

政通橋記

鄭城北出二里許有河西匯密水而東注於汴寔
為達道之衝先是架木為橋漂蕩腐撓無虛歲民
不免於病涉成化壬辰鄭守洪侯之來規為石橋
以圖永濟顧政未孚不欲亟勞其民乃益脩厥政
凡可以殖民者罔不覃舉里巷旄倪歡呼頌德泰
和之氣蒸於鄭封越五載丙申歲大稔民李慶家
蚕繭成衣田春王英家馬駟二駒李忠王亮諸家

牛皆二犢父老趨庭而諗曰側聞明府欲有事於
橋久矣民豐物阜此惟其時時乎不可失願明府
圖之侯乃峙餼糧庀工役具鍾諏時日撤橋之故
址悉甃以石登巨石為梁旁砌石檻為水門者三
廣二十尺袤八十尺有奇測其高視舊得三之一
上下四周鞏固龍密雖洶濤巨浸不能齧而毀也
其規制皆侯所區畫費皆素具不率賦於民而又
得老僧慧廣勸募以資襄之經始於是年七月甲
辰日至十一月乙卯日而落成焉自時四方賓旅
及鄭之民庶車輪馬跡步走擔負於其上若履康

衢咸相與歌曰噫我侯兮庶平政通民和兮橋乃
成功垂千載兮大惠難名父老採輿論名其橋曰
政通橋且走京師徵予為之記粵自遂人失職先
王經野之政不行於天下而橋梁道路皆委於郡
邑之吏吏之尸素玩愒不事於此者多矣間事之
者亦多苟完塞責而不為經久之圖若洪侯之覃
心畢慮以樹功於不朽者能幾何哉予未嘗至鄭
不知是橋與溱洧相距幾許溱洧乘輿之濟孟子
譏其不知為政而言以徒杠輿梁之成侯知其為
政者歟子夏曰君子信而後勞其民未信則以為

厲已也侯不欲勞於未信之先而後之於政通之
後施為有方緩急有序蓋學聖賢之道有醞藉於
中而善用之者歟夫以佚道使民猶不輕用民力
如此况肯為陂池臺榭以供玩好者哉侯名寬字
有約新安之歙人起家鄉貢進士其為政禮賢化
俗簡刑薄賦興利鋤害政治為河南稱首部使者
已庶其跡聞於

朝請加獎拔他日膺顯擢而去凡登斯橋者向永念
之

成化十二年冬十一月既望

賜進士出身翰林院侍講 經筵官兼脩

國史莆田陳音撰

鄭州學田記

劉子奉 命蒞政之三日祇謁學宮脩故事也禮成而登堂與諸生論文事竟周覽廟貌垣墉朱甍壯麗之盛忻然樂之問所以新此者為誰諸生引傳童子昃而告余曰是渠父之義也父名民極故鄭裕族子自幼樂施予用明經舉鄉進士後拜江都令有惠政部使者薦之遭逆瑾柄禍以不附罷歸時學宮傾圮祭器殘缺即慨然嘆曰吾先業足

以食子孫吾弗益之矣尊吾道以風後人吾獨不當為耶於是出貲鳩工為之卓為之帛篚為之鼎若餅獨計宮宇廢奢須以漸次迺市州負郭之田三百畝歲入其租若干積久而裕始大成之甫落成而疾革屬其妻胡曰田由學置既訖工而愛其田是義之不終也免不穀唯汝與子後三年胡遣昃補弟子員奉券歸於學終夫志也夫是祭有常供而生徒之乏困者胥此焉贍鄭之文教丕然以振者傳力居多焉余聞而韙之乃謂諸生曰傳之能義也慮事之周也胡之能賢也守命之固也建

一後而二美并是可書也已雖然使士之游歌其間者不唯道德功名之是務而藉為捷徑以營其私圖甚至覬覦於田之可利而碩鼠益益之不恥者非其罪人哉非其罪人哉諸生皆曰善請以為記余不能辭爰伐石而鑿諸學之右以為世風化之一助云

嘉靖三年歲次甲申三月吉旦

賜進士出身奉訓大夫知鄭州事安福劉汝輓撰

名宦鄉賢記

我

朝重道崇祀而名宦鄉賢必祠之學宮以翼道也名宦則其為治鄉賢表其為俗以埤教也道翼則振教埤則流故學以奠先聖祠以序列賢識治者謹之矧鄭居華中賢之所萃而道之所會也是又可易乎哉夫神羞民之憂也道蔽治之戾也是故志乎民者先乎神志乎治者先乎道鄭之舊名宦鄉賢得祠者周裨諶世叔子羽子產唐服虔婁師德我朝河南副使陳公選郡人右都御史王公彰翰林編脩邢公恭焉耳遺者未之能明也且渾處一堂主賓莫辨劉君汝輓以進士試守茲州展廟

之初慨然嘆曰夫賢有所遺則敬不廣祀無所釐則敬不專不廣不專賢道則不尊聖道孤而教且淪如之何越明年利興弊塞政既通矣於是考誌獻典上下古今用是登祠者視先倍且半焉名宦周頴谷封人考叔北齊長史即孝基唐衛公李靖州尉陸贄宋平章事知州事富弼端明殿學士知州事曾公亮翰林學士知州事宋祁樞密使判州事宋庠龍圖閣學士知州事祖無擇平章事知州事陳堯佐州通判王旦元知州劉永祚劉可任黃廷佐我朝知州洪寬翁文魁郭宏蕭淵州判

旭聶濂學正沈衡鄉賢唐晉公裴度宋樞密使王德用御史中丞李及徽猷閣知制誥孫昭遠皆愛足以遺風足以範也潛德盡耀可謂明矣又新舊祠以奉鄉賢創新祠以奉名宦各三楹焉爰之專其所饗之專其儀可謂尊矣夫德明則人仰神尊則人欽澤之潤而風之嘘自是茲宦茲處者歲時祭享生思所以對之沒思所以入之而鄭亦其弗替哉賢以祠崇道以祠重教以道張是故茲祠舉而教係矣夫祗神則能民隆道則樹治是故茲祠舉而治徵矣嗚呼劉君之賢其將有以風後人而

繼斯祠也哉

賜進士出身奉政大夫山東等處提刑按察司僉事
奉

勅提督學校新鄭高尚賢撰

鄭州儒學重建尊經閣記

國家內自兩京外諸省郡邑悉建學宮殿廡崇祀
先聖先師明倫齋饌有堂生儒有號舍廣狹不侔
規模頗肖制也今

皇上右文重道 詔天下學宮建

敬一亭鑄 聖製立石大哉 聖訓士何幸躬逢

耶更建啓聖祠祀聖賢所自出皆萬世之缺典一
代之偉績焉是以內外臣工罔不仰體 休德崇
重學校迺通平橋胡公來守茲郡公允明廉斷寬
猛近民未期年六事孔脩尤重斯道崇文憐才振
勵士子闡揚 聖訓學宮舊有尊經閣制度卑隘
且傾圮公毅然曰是何足以尊經育士耶乃經營
相度闢廣故基財用磚石則取厥淫祠陶冶料費
工食則日為之所指顧之下庶政咸有辦一無病
於民民樂為役農無廢業工無惰勤肆有羨材經
始於孟夏秋仲落成址饌堂之陰自礎至極為尺

五十深六尋廣倍之為楹八為虹六棟宇悉重拱
案斗相承三祝九甍複檐森栢飛柳雙轆上下相
望四表八維重軒高牖周以楯檻延以梯闌龍騰
虎植翬飛鳥革悉飾以丹碧髹彤文藻羽麗雖樽
櫨榱衍之微靡不繡綺前楫明倫堂遠望宮墻遠
拱 敬一亭傍瀕齋舍眺教山之麓瞰園田之藪
枕峙嵩行襟帶河洛麗譙崔嵬虧蔽城郭真千里
之偉觀也於 是奉 制書於 丌積經史百家集甲
乙之牙籤錦軸輝映梁棟解役之日官師少長咸
登覽焉罔不驚觀駭嘆為千載一遇也鄭為古名

國肇自桓公友受封及子產聽政不毀鄉校號稱
多才迄於今士風敦厚二千餘年于茲乃復有平
橋公之洪業可羨矣於是潘君時表適正學教與
蕭君音徐君壘王君壘諸生馮子應光杜子攀鱗
乃馳狀問記於予予嘉胡公之道潘君之誼用狀
而次第之為記胡公名萬里字伯明關中人己丑
進士平橋其別號云潘君永豐人

賜進士第奉政大夫前福建道監察御史山東按察
司僉事大梁雲夢熊壽祺

儒學新增義田記

昔有宋范文正公嘗以俸資置義田以周給族人相宅地為學以養蘇士民到今感嘆其賢此義田之一見耳至我

朝弘治初鄭人黃元吉先生自蘇之常熟致政還亦以俸資置義田二頃於州庠以供先師誕辰之奠餘為養士之資此義田之再見耳元吉蓋得之文正而復重聖誕又報本之義舉也迄今復有新鄭邑人常氏羨者居鄰州南以嘗置買州民張贊地二頃并送契書為郡庠義田以脩脩祀豐潔之助而養士亦均有所賴是蓋得之元吉而師

道愈見重矣君親師為天下三太君有義親有恩師兼恩義有之澹菴諸公皆欲為師制服重斯道也異端者流尚知重其師降生之辰吾儒獨於此焉畧之矧

聖師以綱常造萬世人物人無父子君臣夫婦兄弟朋友則已有則皆受罔極之恩而義為尤大常氏業農顧亦知所報焉而况於讀書者乎郡大夫前監察御史燕山杜公德仁義之下其事於學乃命師儒迨至學宮以禮嘉獎且與鄉飲春秋頒胙與元吉等所以激後來也人能敦行此義有一善可

錄者孰非文正公一派人乎是為記

正德十三年九月初吉學正李遇春記

王節婦傳

按誌節婦姓楊氏世為郡著姓自幼慈惠貞靜不
妄言咲父宗一日擲錢於地諸子競趨取之節婦不
為動父深異之因與其母氏嘆曰此子不允誰得
之少長即服姆教循閭範既笄許聘今贈大理寺
左寺正貞齋公公名鍊故文安令衡之孫也英敏
聰慧卓犖特達為文沛然自成一家嘗誦讀至夜
分節婦佐以織紵至或忘寢貞齋庸是益奮發自

樹大肆力於諸子百家為學官弟子籍籍有聲稱
試輒居前列顧謂科第可立取不幸賫志以沒沒
之日年甫二十有九耳節婦哀毀不自禁即欲以
身殉諸姊妯婉言慰之曰汝夫今既已矣汝舅姑
俱近衰莫汝二孤亦悉嬰挾汝即欲從汝欲恐亦
非汝夫願也節婦迺大感悟泣下遂不果自是介
然自持罔有二念事舅姑甘旨必盡其分繼姑李
孺人偶暑月卧病稍焮烝難近侍者有懈志節婦
躬親藥餌滌溺器執婦道虔如初后孺人疾愈嘆
曰微此老媳婦吾幾殞矣其孝性純至如此娶居

余四十年足不踰閫外立志之堅守節之固真是以肅秋霜而凜烈日也昔人謂死節易守節難其斯之謂歟前郡侯報其行大中丞魏公特加獎焉扁其門曰貞節子名繼洛別號東圃登嘉靖辛丑進士第授尉郎奏取節婦以是進封太安人其封

勅有云垂老不渝雖古烈女何以加之太哉

王言真是以彰節婦之賢也已繼東圃君陟僉江西按察司事迎養宦邸嘗語之曰汝父有志未遂幸汝有今日汝宜砥礪名節以自樹立斯汝父之

志也東圃君奉命唯謹甫逾期遂無疾卒時諸士大夫莫不景仰節行而以詩文吊之予牧茲土得節婦獲行尤詳且悉故特為立傳以垂不朽庶我鄭民知所感化而繼有興起者云

嘉靖辛亥歲仲秋吉旦

奉訓大夫知鄭州事餘干徐恕撰

宋真宗御製駐蹕詩

款謂已伸祈福意巡方因慰後徠心都畿仰望和
鑿至關輔歡迎警蹕臨地志周爰風俗美郡民徧
洽渥恩深國僑遺愛常如在百執宜思繼德音

政在養民子產能之
咨尔多士無忘仰止

宿鄭州

王維

開元中狀元及
第官至尚書

朝與周人辭暮投鄭州宿他鄉絕傳侶孤客侵童
僕宛落望不見秋霖晦平陸田父艸際歸村童雨
中牧主人東臯上時稼遠茅屋虫吟機杼鳴雀喧
禾黍熟明當渡京水昨晚猶金谷此去欲何言窮

邊徇微祿

僕射陂晚望

羅鄴與隱齊名

離人到此倍堪傷
陂水蘆花伴故鄉
身事未知何日了
馬蹄惟覺到秋忙
田園牢落東歸晚
道路辛勤北去長
却羨無愁是沙鳥
雙雙相趁下殘陽

夕陽樓

李商隱

集賢校理檢校吏部員外郎

花明柳暗益新秋
上盡重城更上樓
欲問孤鴻向何處
不知身世自悠悠

浮波亭詩

陳堯佐

建宇出於波心開軒屹爾空際淪連蕩漾勢若浮

焉因題之曰浮波亭七言短詩一章謹其始云

碧玉波光四面寒
虛空簷宇出林端
塵埃不到交遊絕
遠座扁舟與釣竿

王隨

彰信軍節度使同中書門下平章事判河陽

激灑波光入座寒
翠翎雪雨下雲端
林花四遠餘何稱
好種青青竹萬竿

范雍

資政殿學士尚書史侍即知河南留府事

亭飛彩翼千波繞
橋引晴霓一道端
武帳公餘弄激徹
城頭斜日兩三竿

呂夷簡

清波環繞地無塵
榜署嘉名淨意新
若問經綸廣濟城
亭中兼有釣璜人

鄭州懷古

錢塘孫子良山東
參議

管國新秋葉漸稀
東來悵望不勝悲
荒城日落重門閉
古寺烟消石塔危
駐蹕碑橫猶有字
夕陽樓廢尚存詩
平淮曾羨裴丞相
今見遺墳對古陂

河南薛瑄山東
僉事

自古中州勝蹟多
管城風物喜重過
西來驛路臨京水
東去人烟接汴河
僕射舊陂今寂寞
世宗遺塚尚差我
窮碑誰侶唐裴度
千載勲名永不磨

東里馮振鄉貢
進士

管叔城經幾百秋
乘閑登覽不勝愁
開元寺廢無僧住
廣濟橋荒少客遊
掘地及泉通隧道
鑿渠引水接鴻溝
無端往事皆陳跡
惟有梅山翠欲流

周帝陵

峩峩晴阜俯長郊
漠漠林煙散未消
玉匣珠襦成寂寞
寔寔園螢火竟蕭
條儀旌應闕石
珉紀仁愛惟存史
帙標香帛屢聞馳
驛過明禋何幸際

昌朝

僕射陂

蕩漾平湖拒古陂官名器重竟如何文章猶識前
朝寵雨露應沾北魏多荷芰分香花有艷鯨鱉伴
月水無波懷賢吊古高人事涼月清罇試一過

大夫祠

子僑相鄭七雄尊一見遺祠愧宦情都鄙利功今
未改溱洧橋月夜還明人思舊惠椒觴酌雨積空
皆免麥生鄉校至今留不毀可知郡邑足書聲

丞相塚

玉魚蒙葬慰孤忠雲黯松楸洧水東牲石細鑄身
世罷山花頰簇夜臺紅旌勞已重唐朝典平賊全

叔上蔡功最愛墳頭林錦月清光常照未無窮

管叔城

此地曾封管叔來敗垣殘壘古城隈荆榛蕪穢樵
人取林樹陰森野鳥哀擊壤已聞周重賜流言欲
動上多猜登臨莫問當年事且酌尊前酒一盃

祭伯城

力顧成周籍寵榮分茅如鄭築高城林鶯啼客追
前事衰州迎人感舊情臺榭荒涼卿士去溝渠橫
錯楚農耕時逢郡志追封事賢相長留萬古名

夕陽樓

下春林抄拂紅綃嵩華西看半寂寥十二闌干吟
獨倚三千風月坐相邀長天秋水悠悠靜孤鷺殘
霞縷縷飄古往今來多送別不堪煙景晚蕭條

候月臺

經秋城郭散涼颼臺上無雲月可邀把酒高歌來
此夕刻珉閑翫想前朝影移桂魄姮娥下輪隱山
河境界遙坐對清光重回首中原氛祲光全消

浮波亭

前條館水構高亭湫湫波光入望平潏灩偏宜沙
鳥浴澗深應許海鯨行涼生枕簟迴微閨影晃城

樓見底清何日乘閑邀皓月放歌持楫擊空明

列子觀

杖藜徐步訪仙原觀隱樵蘇見敗垣籟振林巖疑
劍佩雨餘庭砌隱苔痕長生有術嗤聃史汗浸多
遊鄙漆園獨運剛颼九天去清風千古詠高原

鄭州懷古

潮郡林厚

乾坤此日正清寧弔古無勞感客情秦漢權輿開
縣治隋唐沿革立州名荒城曾說監毅士遂道無
由見寤生隱隱梅山遙接密滔滔汴水遠連京南
陵松栢圍周寢東郭桑麻接祭城泮水豐碑猶峙

立禪林僧塔半歌傾昔聞晉楚爭要領今喜華夷
樂太平幾度觀風巡境內棠陰處處頌歌聲

鄭州懷古

彬江高信

河南參議

管叔東封土一丘不知何代却為州大夫廟古人
猶祭僕射破顏水漫流草滿荒郊裴相塚煙迷故
址夕陽樓嗟余好古生來晚在在名邦細訪求

總諫鄭州懷古

郴陽曹璉

河南僉事

管城一望思依依周帝荒陵接古陂斷石久埋丞
相塚井廬猶建大夫祠夕陽樓廢陽回早候月臺
空月上遲欲步浮波追祭伯細將列子論希夷

公孫大夫廟

廣西包裕

河南僉事

當時豪傑事縱橫獨有先賢治尚平四善見祿君
子道一寬無愧惠人名濟人渡口苔空合聽政堂
前月自明按部今從祠下過高山仰止不勝情

清江彭綱

河南僉事

古廟臨官道清秋照夕陽愛遺緣政猛國在仗辭
臧墓艸年年合爐檀日日香公孫千載業鄉里奉
蒸嘗

錫山秦金

河南副史

辨香端拜大夫祠千載高風想見之愛士不忘鄉

校化濟人猶說乘輿私雲荒碧州迷春塚雨濕蒼苔
古碑鄭國山川登眺裏獨留遺像不勝悲

入鄭州南境

光州喻時

監察御史

獨憐三月近不見百花薰赤地幾遺麥黃沙半入
雲人稀村犬靜山碎堦河分兵馬猶繁鬱鬱還看刺
史勤

瑞黎詩

貴溪楊端倫

閱將紫條植亭中春風一度旋成功瓊英夜懸
龍吟冷玉骨光浮曉霧籠地道無心私物類天公有
意遠仁風佇看他日金盤薦白與山花迥不同

零都何進隆

雲龍見處澤偏多潤濟元元又若何異種不沿金
谷化餘輝遙映洛川波漫尋鍾乳求奇壽喜見交
梨醒俗魔從古管城多政蹟那更勝事動謠歌

河南鄭州志後叙

中州之勝聞天下久矣在昔賢哲君子往往
生於其間而鄭固其封域也予書生時讀書
書至國僑子皮諸傳述未嘗不想慕其
勝以爲何得一至地而考其經綸之迹也予固嘗
志焉而勢弗之逮也庚戌初夏予奉

命往守茲土方懼才識闇劣無以稱塞責任
而又竊自私計以爲曩時心志之所欣慕

者茲得訪而行之其度幾乎既抵鄭道
理刑東湖楊公署州事以印綬授予且曰鄭民
純訟簡所不堪者在舍循所大缺者其誌書乎
予識之而未敢忘也視篆月餘政事初暇
時出博求古名蹟而觀之皆湮沒無可考者
於是求諸誌又散逸已多而存者率後載
彌文不切事實嘆曰是不爲鄭之缺典也哉
夫周禮在魯識者知其國有典刑之獻無

徵孔聖尤深致意焉故國之史州縣之誌一也
而鄭尤當東西南北之衝非誌則曷從徵
考巨爲弛張設施之地也哉於是與楊子
少漁諸同寅冀郡博晏子仰壺軍謀之
僉曰題哉以史氏求僉曰東圃王公予於是
備幣躬往請爲辭請之再辭亦再予曰
倚鄭誌爲鄭也公奚辭且制作亦大維
艱未易易也公文學之優節行之高比自

兼有之茲適以制家居是亦事幾之不
偶也而可負此良會矣乎遂踵委幣為
而公亦無以辭越明年秋誌成為卷有六
曰輿地志曰田賦志曰建設志曰職官志曰人
物志襍志其目二十有二而各以其類附焉
刪繁去冗綜核名物而一州之事實燦然
備矣夫古之賢大夫舊令尹之政必以告新
令尹子無以告者茲賴東圃公之力得成

此編以永諸後後之守鄭者得是編而後
考其故則亦不待他求而諸凡舉措將亦
無不得其理矣故稽輿地誌則一州之險易
以備稽田賦誌則一州之征輸以備稽建設
誌則一州之政體以備稽職官誌則一州之
治理以備稽人物誌襍誌則一州之文獻臣
備尋芳吊古皆可無事其不為忠告之
一助也哉是用僭言於末簡云告

嘉靖壬子夏四月奉訓大夫知鄭州事

越徐恕撰